


# G W A L A R N



150-151  
GOUERE-EOST  
1942

GWALARN  
Niv. 150-151  
18-vet Bloavez  
GOUERE-EOST 1942



## TAOLENN

	Pajenn
Lazadenn Unvab Aife (Roparz Hemon) . . . . .	337
Barzonegoù (Gawain) . . . . .	348
Barzoneg (Yan Eozen Jarl) . . . . .	357
Janedig ar Rouz (Abeozan) . . . . .	362
Spered Bro-Japan (Arzel Even) . . . . .	392
Kudennou distaga . . . . .	409
Te pe Chwi (kendalc'h) . . . . .	418
« Gwreg an Toer », prezegenn-skingomz Roparz Hemon) . . . . .	425
Gerioù angl-saoznek e brezoneg . . . . .	428
Ki-red an Neñv (Francis Thompson ; tr. Roparz Hemon) . . . . .	430
Kanenn Altabiskar (tr. Maopreden) . . . . .	437

## LAZADENN UNVAB AIFE

gant Roparz Hemon

Pep gwir miret striz

*Perak e lazas Kouc'houlin e unvab ?  
N'eo ket tenn da lavarout.*

*Aet oa Kouc'houlin yaouank da zeskīñ micher ar  
brezel en hanternoz, gant merc'her Ardheim, kadou-  
rezed : Skatac'h an Elevez, Uatac'h ar Spont hag Aife  
ar Gened.*

*Un noz e teuas Aife d'e gaout. Hag eñ ha kousket  
ganti, hag engehentañ ur mab, ha reiñ dezi ur  
walenn :*

*« Va mab a zouigo ar walenn-mañ d'e driwec'h  
vloaz, » emezanñ.*

*Aife, kadourez yaouank, feuls ha gôuez,  
Yen 'vel ar c'hreiznoz yen ma vourr da ene,  
Ha koun ac'h eus ?*

*Dre ar pantennou gleb  
E redemp 'hed ar goañv 'vel c'hoar ha breur,  
Strivant, o klezeiata, o hemole'hiñ,  
O teskiñ rin ar brezel skoaz-ouz-skoaz.  
Ha gwech, da speg a nije dreist d'am hini,  
Ha gwech e vezen trec'h.*

*D'an derou-noz,  
E kluchemp 'tal an tantad ken na gloze  
Eskell an hun war hor malvennou skuiz,*

Ha gortoz d'hon azbevañ bannoù lent  
Ar goulou-heol.

Betek an nevez-hañv.

Un noz m'edo al loar 'n he c'hresk a-dreuz  
D'ar bezv o garou splann el lusenn arc'hant,  
Hag ar bed-holl o krenañ war ar vevenn  
Etre ar bezañ bet hag ar c'hoant bezañ,  
Edomp hon-daou, war-lerc'h un devez kalet,  
Astennet war al leton.

Ken na veskas

Va anal gant da anal ; ha va brec'h  
A glaskas gwrez da gorf.

Ha trumm e verzis,

A blac'h ! an tan o verañ dre bep neudenn  
Ac'hanout, ha'n ur fromañ gant an orged,  
Da askre wenn o koeñviñ.

Nozvez verr :

Nozvez a hud a ra va buhez-holl  
Un hiraez don, pa glaskan em nozveziou  
Un adskleur gwan anez ; hag a vano  
Ur frond, ur broad em eñvor da virviken.  
Rak antronoz 'vel bemidez a dremenais,  
Goustadik, te dilavar, me simudet.  
Ha biskoaz ken, a vaouez ! ne deurvezis  
Aspediñ diganit na trid na sell.

Ha ne voe ger etrezomp ken na loc'his.

Neuze, 'n ur astenn dit ur walenn aour :

« Da reiñ, » emeve, « mar deo youl ar Bed,  
D'hor mab pa vezou deut d'e driwech' vloaz. »

Goude triwec'h vloaz, edo bodet Uladiz e-tal an aod, pa weljont un den yaouank o tont daveto en ur vag.

Kondere mab Ec'hu a yeas en arbenn dezañ. Rak-tal e voe trec'het ha liammet gant an estren.

Konall a yeas d'e dro d'en em gannañ. Trec'het ha liammet e voe iveau.

War se e teuas Konôr ar roue davel Kouc'houlia, ha dre al le en doa touet gwechall, gourc'hemenn dezañ lazañ an divroad.

Triwec'h vloaz a dremenais.

'Tal an aod

E oa gouel bras Uladiz.

Bodet oamp

Da darz an deiz, pa weljomp war ar mor  
Ur vag o tont a-bell.

E-kreiz ar vag,

Ur paotr e-unan-penn.

Hag i da sevel,

Da sourral ha da voudal 'vel an deil  
Pa groz en oabl an arnev :

« Un enebour !

Un estren deut da saotrañ ribl Iwerzon !  
Ra vezou lazet ! »

Sevel 'ris d'am zro :

« A dud, » emezon, « klevet ne deo bet  
Biskoaz hor bije nac'het bod nag herberc'h  
Ouz neb 'zo bet forbannet eus e vro.  
Lezit ar paotr da zont, ma konto deomp  
Abeg e zonedigez. »

— « Dall ez out,

Kouc'houlin ? Peur e weljout un harluad  
Ken sart e neuz, en ur vag arem-holl,  
Skedus, he gouelioù sez, he roeñvoù aour,  
O fregañ sioul an tonnoù, her ha lenkr ?  
Sell, aze 'mañ e gleze hag e skoed ;  
Ur vatalm en e zorn, ha mein e-leiz ;  
Evned a bak 'n ur c'hoari, ouz o lezel  
Da nijal kuit, evel oc'h ober goap.  
Hon daeañ 'ra ! »

Ha gwir, ar c'hennard bagol,  
A-vec'h m'oaa sell an den 'vit heuliañ fiñv  
E ziskoaz hag e zivrec'h.

Dont a reas,  
Ur mousc'hoarz war e vezirek, tre betek  
An traez ; ma leñvas strad ar vag 'n ur skrabañ  
Ar bili gwenn.

O lammat mibin oa,  
Pa huchas dezañ trumm Kondere yaouank :  
« Da vro, da ouenn, da ano ! pe anez  
E ranki stourm ha meravel ! »

Gant dismeganis,

E vatalm o troiellañ, 'me ar paotr :  
« Va bro, va gouenn, va ano, n'eus nikun  
O c'hlevas diganin. »

A-vec'h e-oant  
A-gevret 'mesk ar c'hoummoù ma'z echue  
An emgann, mar deo emgann gwelout pakañ  
Ur yarig 'kreiz ar porz gant ar c'heginer !  
Rak paket oa Kondere, liammet-brav  
Gant fun ar vag, ha stlapet war an traez !  
Konall, avat, an Trec'houri, en doa sailhet,  
Kroget e penn ar staon, en ur lavarout :

« Kaer eo da c'hoari, paotrig ! Din-me bremañ ! »

— « Dit-te mar kerez ! »  
Hag en ur serr-lagad,  
Torc'hwenie Konall Drec'het 'kreiz an hili.

Tavet ar bobl.  
Konôr, ar roue bras,  
Wêlis o tonet, e izili koz  
O krenañ gant ar gounnar :

« A Gouc'houlin !  
Trubard ! goapaet e vezimp gant ur bugel,  
Ha te lezirek, vak ? Ankounac'haet  
O deus da gleze ha da skoed al le  
Touet ganit gwechall da skarzañ kuit  
Diouz aod Iwerzon kailhenn hag amprevan ?  
Bremañ kae : stourm gant henhort hag e lazañ ! »

Emer, gwreg Kouc'houlin, a lakaas he brec'h en  
e gerchenn, o lavarout :  
« Arabat dit diskenn. Aze emañ da unvab ! »

Va gwreg, — ur vaouez fur ha leal, — a lakas  
He brec'h tro-dro d'am gouzoug, 'n ur hiboudiñ :

« Kouc'houlin, paouez ! ha ne welez ket  
Ez eo da vab a lazez, ozac'h kaez ?  
Mab an estrenez espar ac'h eus karet  
Du-hont, e latar blot an hanternoz ?  
Kouc'houlin, kammed ne damallis dit  
Un tañva berr pe hir a bep oriadez,  
Ha me, en ti, a-hed an nozvez pouunner,  
Va-un, infañvezheñvel, gant ar gwent.

Muioc'h a rin : digeriñ frank va divrec'h  
Da vab eben, ha pokat sioul d'e dal.  
O, lez ar vuhez gant ar c'hrennard flour ! »

*Kouc'houlin, avat, a yeas d'en em gannañ gant e  
vab hag e lazas.*

A verc'hed ! gant ho komzoù madelezus,  
Na rannañ 'rit kalonoù gwazed paour' !

Pe ezomm, Emer, az poa da hekleviñ  
Pez a lavare din va c'halon 'dal  
Ma yerzis bag ar bugel war ar gwag ?

Gouzout a raen ervat, kent din da welout  
Ar walenn aour o lintrañ war e viz !

Gouzout a raen, rak diouz ar primañ sell,  
Aife, va c'hentañ karet, oa dirazon :  
Lun glan he dremm, hag he daoulagad bras,  
Karget a vam.

War jod ar paotr, avat,  
O parañ drant, ur flammder hep e bar  
Nemet ar sked dameuc'het din en hañv  
E loc'hioù boull an érin.

Sellout c'hoaz,

Ha sellout c'hoaz am bije.

Met ar bugel,

Pintet evel ur c'hogig war e elloù,  
E speg er vann, a venne tagañ.

Trumm

E fraoñvas strink ar benveg dreist va skoaz,  
Soublet a-vec'h.

Ma kerzis war-du ennañ,  
Ha terriñ krenn e gleze en ur c'hoarzin,  
Ha kregiñ en e c'houriz.

Dizouj-kaer,

E harpas war va brusk e zaouarn noaz,  
E silas 'tre va divhar hag e splujas,  
Oc'h ober din bransellat ha bransellat,  
Ha sankañ meur a wech dindan ar fru.

(Ha me, diboell ma oan, oa fouge ennon  
Gant gor e vrouez ha servder e daerijenn.  
E lezel 'raen da strivañ ha da skuizañ,  
Da boaniañ ha da zielc'hat.

'Vel ar c'hi

O c'hoari gant e goleñ)

Hir e padas

An emgann.

Hag eñ faez, hen savis goustad,  
Keuz din da yezañ trec'h, damantus, tener.

Ur sell a daolas ouzin, ha raktal,  
E zremm morlivet, glas, e kouezas 'vel  
An dramm dirak ar falc'hér.

Marv e oa.

*Ha ne voe tra par da c'hlac'har Kouc'houlin.*

A, paour kaez tad divabet, dre an houl  
E tougis kig va c'high betek an aod,  
Izil ha blin va divhar en un taol,  
'Vel un den koz ha kabac'h.

Tro-war-dro,

An oabl, ar mor un duder.

Ha va c'heuz

O sevel hag o sevel 'giz ul lany ;  
Ar Bed e-kreiz diruillet 'vel ur blouzenn ;  
Me ha va c'heuz ha netra ken.

Va mab,

Te ha na glevi ket ar gomz wenvidik :  
« Va mab », a darze kent eus don va askre,  
(Ha me, e barr al lorc'h pe al levenez,  
O kounañ trumm ac'hanout, du-hont, pell,  
E-tal da vamm o kreskiñ, yac'h ha glan).  
Ha gwir ez eo ? Né deus ac'hanout ken ?

A, glac'har lemmoc'h eget kement skalf  
Digoret gant klezeier mil enebour  
A-hed ur vuhez hir !

Va mab, perak

E choman bev ez koude, pa oa dit  
Va c'halon-holl ?

Perak ne don ket draillhet,

Muturniet ha mac'hagnet ?

C'hwek d'am c'horf

E vefe gouzañv poaniou, dougen merk  
Da valc'hder yaouank.

C'hwek 've din kosaat,

Dilezet, en ul lochenn war ar menez,  
Un denig paour ha gwan, o kerc'hat dour,  
O faoutañ keuneud, sioulik, d'abardaez ;  
Digousk, o soñjal ennout 'hed an noz.

A vab kenedus, karet 'vel an deiz,  
Da gorf astennet mik etre va divrec'h,  
Ha tomm ar gwad 'hed da izili gwenv,  
Damskedus, digor da zaoulagad glas.

Da vlev melegan hir a-vesk o bleñchou  
Gant bleuñv an donn.

A-dreuz d'an eon ez tougis,

Ha menel war an traez, e-giz ur roc'h,  
Ur bern a reuz, ouz da vriata gouez,  
D'am beyder d'az tasorc'hiñ, pe d'az marvder  
Da sonnañ krenn pep elfenn eus vā gwrez.

*Ur youc'hadez kreñv a savas en enor da Gouc'houl-*

Ur safar boud o trec'hiñ trouz ar mor  
A zasson eus an tevenn.

Aze holl

Emaint o youc'h hal hag o hejañ drant  
O breech davet an haroz bras, diwallour  
O catal hag o ed.

Va foibl.

Va zud.

Padal o c'haran.

Bemdez 'm eus evito

Labouret start hep damant ouz va foan.  
Faezet em eus er gwalarn hag er biz,  
Er gevred hag er mervent tro-ha-tro  
Brini ar c'hoabr ha naered ar wall-amzer,  
Ramzed ar c'azar'h war o mirc'het du,  
Ha sorserezed hakr e pleg ar gwent ;  
Euzviled am eus breset gant va zroad,  
Ha teuzet spesou tanav gant va sell ;  
Ha graet e meur a vrezel kuriou marz.  
Fiziañs o devez ennon, ha bepred  
Galvet e vin d'o difenn ken na gouezin.

Rak me a zo Kouc'houlin, kadour meur  
Uladiz.

Me a zo Kouc'houlin !

Mab,

Pa savfes laouen-lintrus eus an donn,  
Da lazañ 'rafen c'hoaz, divroad taer,  
Enebour hon enezenn !

Ret din klozañ

Bremañ va glac'har-den e skrin va c'haouded.  
Leñvañ 'zo gwan, ha tevel a zo gwell.

Ahont e krimp an heol gant bri an oabl ;  
Ar beure yaouank 'vel va mab 'zo marv,  
Ha marv e goskor skañv ; an devez krin  
A ziroll bec'h e drevell hag e breder.  
Heol, desk din derc'hel striz da hent ar ret :

Bevañ, ha daoust d'an amzer bevañ c'hoaz,  
Strivañ, strebottiñ, bezañ trec'h !

Fenoz

Festal ha mezviñ 'rin e salioù Emain.

O c'hoarz, donezon an erevent glas  
A builh e don an douriou hag ar reier,  
Liammet o spered ouz ar glen, bugale  
Dana ar vamm diheskus, — deus da vougañ  
Ar vouezig sempl a hiboud kañv ar Bed.

C'hoarz, tarz e kev va bruched ! gwe  
Pep kigenn war va fenn ha war va skoaz,  
Ha gra d'am lagad sailhañ ha d'egile  
Sankañ, ha gra d'am c'horf hiraat ez divent,  
Dezo da venel bamet ha da skrijañ,

Ha da lavarout : n'en deus ket e bar,  
Hon aergi, hor C'houc'houlin taer, da farsal !

Gwazed a stou dirazon hag a venn  
Daskoriñ din o frankiz hag o youl.  
Paotred a dro davedon dremmoù sklaer ;  
Diganin broud hag atiz a c'houennont.  
Merc'hed a ziskouez din o askre noaz,  
Damzallet gant va splannder.

Te, Kouc'houlin,  
Ur bobl a-bez az ambroug hag az heuilh.

Ha me, va-un emaon em peurbadelez.

21 Mezeven 1942 — 2 Eost 1942

## MEZEVEN

Skuiz on gant an deiz na venn ket echuiñ.  
Gant ar sklaerder bras er c'hornog o terc'hel an  
oabl en e ser, hag ar mor, hag an inizi.  
Poan a ra din klevout garm skiltrus ar gwennilied.  
Ne vorran ket en anal c'houyen an afrenn.

Serriñ a rin ar stalafioù, hag ar prenestr ; klozañ  
a rin ar gouelioù voulouz pounner.  
Din-me an noz, an didrouz, ha lagad kuñv ar gleuzur  
e-tal ar bank.

Te a vo er gambr ganin ; dalc'het hon daou gorf  
e-barz ar gambr, sparlet, prennet, alc'houeziet evel  
en un arched.

Ma vez diae'hub hon huñvre,  
Ac'hano e tizimp planedennou diniver.

Sterèdennoù en hor blev, steredennou ouz hon  
treid ; hent-sant jalm en-dro d'hon div lez da c'hou-

riz.  
Diganin e c'houlennes : ha tec'hout a c'hellimp  
biken diouz an douar ?

Diganin e c'houlennes : ha tec'hout a c'hellimp  
biken diouz an amzer ?

Serr da zaoulagad, ha gortoz. An douar a ruilho  
goustad a-zindanout. An amzer a nijo goustad  
a-ziwar da dro.

## GORTOZ.

Hogen, ha dizoleiñ a ray an neñv ?  
A-walch a aters. Na glaskomp netra. Na glaskomp  
ket bout eürus, va muiañ-karet. Harluomp ar siñv,  
ar gomz. Harluomp ar soñj zoken.

Regiñ a rez ar ouel voulouz. Digeriñ a rez ar pre-

nestr. Bountañ a rez ar stalafioù.

Ha setu ar mor gwelevus o tont davedomp, an oabl  
flamm, hag ar sklaerder-hont na echuo ket.

Ha bez' ez eo ar pardaez, pe ar mintin ?  
Klev ar gwennilied, klev ar pesketaer o kanañ, klev  
ar vugale o c'hoari war an traez.

## BEUREOU

Beureou, beureou leun a gleier, beureou sklintin.  
Leun an draonienn a safar ; leun an oabl a skle-  
rijenn.

Galv ar c'hilhog, fraoñv ar c'harr ha tourni rod ar  
vilin.

Hag ar c'hood bras karget a c'hliz o vouskanañ  
goude hirvoud an hanternoz.

Ahont e tihun ar mor en e yaouankiz.

Hag e tarz an nevez-hañv dre va frenestr digor.

Levenez divent ar bed o tont davedon, o lammat  
davedon, oc'h aloubiñ va daoulagad.

Seizet emañ va c'halon betek ankounac'haat n'edos  
ket aze, em c'hichen, va muiañ-karet.

## GLAV

Glav a ra, va muiañ-karet, hag e sellan ouz an  
hent.

Ouz ar bodoù hag ar skourrou hejet gant an avel,  
takennou lintrus o fiñval e beg o delioù lenkr.

Ouz an douar gleb e sellan, strewet a vleuniou lireu,  
oc'h evañ an dour, habask.

Habask eo ar bed-holl dindan ar glav.

Habask eo an oabl louet.

Habask eo ar glav.

Dihabask eo va c'halon. Da c'hortoz a ran.

Ahont, a-drek 'an aridennad kelenn, e spurmantan  
da vantell. Hag ez anavezan da gerz, ha da emzale'h,  
kent da anaout da-unan.

Bez' e lamm va c'halon. Diskenn a ran. Digoret  
em eus an nor dit. Hag e veizan en un taol perak oa  
ken habask an oabl, ar glav hag ar bed. Gouzout a  
reont e vo dic'hoantet pep c'hoant ha darevet pep  
azvder.

Peur e ouezin-me gortoz evelto ?

HUN

Pez a glaskan c'hoaz en deñvalijenn eo splannder da gorf noaz.

Da gorf nerzus ha yaouank, tener ha frondus evel ar bleuñv.

Da gorf a vag va huñvre.

Da zivronn c'hwek, da izili gwevn.

Pellaat a ran diouzit. Ha da biaouañ a ran c'hoaz.

Aze emañ da c'henou, damzigor evel ur frouezenn skuiz gant hec'h azvder.

Aze, evidon, e lugern c'hoaz da zaoulagad.

Ne gredan mui strafuilhañ peoc'h da zivesker.

Hogen pouez da gorf war va c'horf a zo skañv ha kizidik. E zougen a ran, lorc'hus, dre islonkou an noz.

Da zougen a ran ha da c'chronnañ e-giz un askell-groc'hen.

E-giz un aerouant, un euzyil, ur suner-gwad marlonk.

Ennon e red evel ur froud galloud hud da yaouan-kiz. Beuziñ a ran er stêr wrezus o stivellañ diouz da stumm astennet, mik, og, divi.

Pokoù a sav hag a sav c'hoaz d'am diweuz.

Hag e sankan e-kreiz va hun davet ar mintin yen.

DOUAR

M'he dije va c'halon ezomm eus un doue, e ouzon ervat pelec'h hen kavsen.

Nann en tu-hont d'ar gwel, nann en tu-hont d'ar poell, nann en tu-hont d'ar meiz.

Stag-mat e vefe ouz an douar.

Er vein e vefe e arouez ;

En derv hag en ivin ;

En armou glan.

Hag e vefe e zremm war mor an hañv o tameuc'hiñ an heol, war mor ar goañv meret gant ar gwent.

Er pouolloù-dour a-hed an hentoù, en andonioù ar choadieier, el loc'hiou elestrok dizolo e vefe e zaoulagad.

An heol war ar run a vefe mousc'hoarz e jod hag ar glav war ar waremm krizoù e dal.

Ar meneziou hir ledet e rihl ar pellwel a vefe e izili.

Red an avonioù hag ar stêriou, ar froudou hag al lammoù-dour, ruz ha gwer, kas ar gwad en e wazied.

.....

Hogen aze emaout, va muiañ-karet.

Keit ha ma vezi ganin, ne din ket da glask va doue.

## TREC'H

Sevenet eo bet va c'hoant.

Ha neoaz, ne gredan ket kregiñ em eürusted.

E-giz ur bugel o sellout ouz listri meur o tremen war ar mor bras ; hag ar mor bras o koazañ da vent un oglenn, hag al listri meur o vont da c'hoarielloù. Ne gred ket astenn e vrec'h.

Evel-se emaon.

Ha trumm, e ouzon on bet trec'h. Hag e strink an eurvad ennon evel ur froud, ha ne fiñvan ket koul-skoude, ha ne dridan ket, ha ne skrijan ket. Sioul eo va c'halon. Mouse'hoarzin a ran ouz al levezenez.

## EURUSTED

Ha pa'm dilezfas un deiz, un dra a chomo ganin : Va eürusted.

Te eo ac'h eus pourchaset din va eürusted. He foranet n'em eus ket.

He miret em eus piz ha krin. He miret em eus e plegoù hag e kornioù-tro va ene. Pez ae'h eus gwelet o skediñ war va dremm, a ! gwanat skleur eus an heol em c'halon !

Deuet an deizioù teñval. O gedal a ran, diseblant. Rak biken ne day da hesk teñzor va eürusted. Dalc'h-mat e tarzo em c'hereiz feunteun va eürusted.

## LEVENEZ

Da levenez a zo dit, a zo dit da virviken.

Dalc'h atav da levenez.

Rak kaer o devo ober, ne c'hellint ket he diskar.

Diskar ar predouigou berr ma'z out bet gwenvidik,  
se 'zo dreist da c'halloud ar bed.

Pep glizenn, pep takennig skañv a lufras en heol,  
mar dalc'hez mat hec'h eñvor, a zo kaletoc'h eget  
diamant.

Da holl boanioù, mar kerez, a steuz dirak ul levez-

nez.

Ul levenez koz ?

Ha kozañ a ra ar stivell ? Ha kozañ a ra ar stêr ?

Ha kozañ a ra ar mor ?

Ha kozañ a ra al levenez ?

GAWAIN,  
*Nevez-Amzer 1942.*

## BARZONEG

gant Yan Eozén Jarl

En noz gwall  
Gourvezet va douar  
Ha beuzet va zal  
Er c'hlac'hар.

Perak eta e tarlamm va c'halon  
Mui-mui bemdez ?  
Kéz lies,  
Ez-wir,  
Tonn wenn va gweñvdir  
na drid.  
Va c'haez brennid,  
en eur c'chedal  
Ma lugerno war hor pal  
trec'h diarvar  
hor c'hounnar,  
a gren 'vel dour an avon.

Perak eta e yud em c'hreiz  
youl digabestr hor frankiz  
pa 'z eo ken dous an noz  
war benn ar roz ?

Gant skin gwenn al loar-gann a red en avel flour

Davet ar bleuñ a dav, bannou ruz ar sferennou  
A lid sart, en aer c'hlas, eured-noz o skleur aour.

Gousklerder puilh a weñv en neñvon,  
endra ma strilh em c'halon baour  
teñvalder suilh ha goañv ar c'hañvou.

Ar meneziou glas-koar ha blevek, lann ha brugou,  
eus ar pellder gant gred a selaou lanv ar mor  
o pleza hir ha kreñv heson-meur e wagennou.

Kanennou a eñvor  
war delenn ar maeziou...  
Glas ennoun a emdorr.

Padal eun doan a sav he c'hroz a zor da zor,  
Ha gwent hep nerz an noz a chom berr da ziarbenn  
Al latarenn a rec'h a vrev o hun d'ar goskor.

Perak eta va c'houn  
prim 'vel eur bann stêr a dreuz an oabl doun,  
davedout, va bro-mie, a zired,  
a-hed  
an noziou hir  
am broad gant melkonii o bir ?

Perak eta e-doug an noz steredennet  
gant oged ar gwalleur roget  
e hirvoud va spered ?

War da zremm ken kaer ha gliz ar glen  
Pa zigor  
Ar heure gwenn

E red an daerou kriz  
A va Breiz !

Hep harz, ra skiltro pell mouez teñval du da anken  
Ha garm da gañv, a vogt dourn yud an estren !  
A ! soñj, en amzer gent, pa 'save frank da benn ;

Pa gane kant eurvad ez tier drant, hep kemm,  
'vel dour sklaer ar stêr fresk o tiskenn gae d'al lenn,  
'vel tonnou sklent ar mor o taskiria o c'hlemm ;

Pa gelenne ar vamm, hep nec'h, e peoc'h an noz,  
Bugale greñv ha taer mezevennet o dremm  
E tan meur an Heol splann ha c'houek ha leun e  
[vennoz ;

Pa venne kalon domm da vibien galet mervel  
Kent plega dindan weskenn aour ar brevour koz,  
Dre garout-tre da yez, da hanez ha da vanniel ;

Pa oa da youl hep nask, pa oa da vrec'h hep mac'h,  
Pa gerzes kaer ha gwerc'h, hep dalc'h evel ar winel  
O strinkal trid ha c'houez da nerz ez kan a dreac'h ;

Pa ne sunet ket c'hoaz ar c'haz-mor hor gwad ruz,  
Na kened hor merc'het, na kreñvder koun hon ac'h  
Na glande hon ene, na brud hor gouenn c'hallantus ;

Pa ne blege hon tud o sell dirak nep gour,  
Pa zalc'he start hon eor war roc'h doun hor yez varzus  
Tre ma koueze re all o vont gant froud an dour ;

A-liou ar gliz, da c'houlou deiz, e kalir pur

Ha greunek mel, ar bleuniou mae, oa da zremm flour  
O lintra meur, gant dudi kaer, da galon illur.

Perak e floura va brûched  
Plañsonou karet an amzer  
tec'het  
er pellder ?

Perak e fell d'am c'hoantou gell  
sevel  
D'ar stourm meur  
Gant va breudeur ?

Perak, e-pad ma wask an noz enkrezus  
An neñv dudius,  
E welan heol ar Gwenved kollet  
O lugerni e bez hon estlammou tremenet ?

A ! teuzit en islonk du  
Menoziou taer, va huñvre guñv !  
Netra ne darzo mui eus kemend-all a vleuniou,  
Rak sec'h eo bremañ sev an dervennou  
Ha trouc'het andon bev an douriou sklaer.  
Pep tra, mouse'hoarz ha poultrenn, a zo beziet er  
[c'heler

Netra ne dalv : na spoum, na gwad an emgann,  
Na youc'h, na garm, na striv, na brouez, nag estren-  
Netra ne dalv [van.  
Nemet galv  
Doue  
E digenvez an ene.

E nerz 'zo d'ar vrec'h  
A donkas d'an trec'h  
Adal ar c'chantvediou  
Leun a reuziou.

A ! Krist,  
A-hed an euriou trist  
E-harz da dreid e pedan  
Hep ehan.

Heol dispar,  
Selaou ar bedenn vlin  
A ran war va zaoulin,  
E dounder noz, va ene klouar :

Ra lintro splann war hon tal  
Laouen,  
Goude mac'h an noz dall,  
An Deiz,  
Ma c'hello er Gwenved all  
Tridal  
Hor c'hereiz  
E tan da sklerijenn,

Ha ma kerzo d'an daoulamm gouez,  
A-gevret,  
War hentiou glan ar vuhez  
da zont,  
Mac'hous direiz hon dispi garo,  
a houarno  
Karantez dispons  
War douar hor Bro adkadarnaet.

5 a vae 1942.

# JANEDIG AR ROUZ

PEZ-C'HOARI GANT ABEOZEN

Hervez ar pez a oa bet divizet etre Herri IV hag Elesbed, Rouanez Bro-Saoz, d'ar pevar a viz Ebrel 1591, e leuas 2.400 soudard saoz, dindan urz ar jeneral Norris, da zouarañ e Pempoull. Ur respont oa kement-se d'an 3.000 Spagnol a oa deut e miz Here 1590 da harpañ ar Re Unanet, dindan urz Don Juan del Aguila.

Pempoull a oa neuze e kerz ar baron Renan Avau-gour a Vertus, unan eus letenant Priñs Dombes, a gomande e Breiz a-berz ar roue. Difennet oa kér gant Ronan de Grezilles, Aotrou Tremblai. Un denjentil a Vro Boatou oa hemañ, koronal ar varc'hiegiez, unan eus gwellañ kadourien tud ar roue, preizataer dispar evel kalz re all, hogen hardiz dreist ar re hardisañ.

N'oa ket bras a-walc'h kér Bempoull da reiñ bod da gement a soudarded saoz. Setu ma voe soñjet reiñ dezo Enez Vriad. Merdeidi Enez Vriad a oa a-du gānt an dug Mercœur, ma veze distaget e anv « Mercure ». er c'hwezekvel kantved. Argadiñ ha preizataer rae dibaouez Briadiz war an aodoù. N'oa avat en enezenn nemet tregont soudard en ur c'hreñvlec'h.

An Tremblai ha Kergomar, gant ar Saozon dis-kennet e Pempoull, a zirollas war an enezenn. Briatiz a gemeras an-tec'h war o bigi. Ar soudarded n'hell-jont ket herzel pell er c'hreñvlec'h hag an Tremblai a lakaas krougañ pemzék anezo ouz bannoù ar milionù avel.

*En un notenn e Gwerzioù Breiz-Izel p. 325, An Uhel a lavar ez eo eus an Tremblai-se a reer meneg en daou zoare dastumet gantañ eus gwerz Janedig Ar Rouz.*

*Setu a belec'h em eus tennet danvez ar pez-c'hoari-mañ.*

ABEOZEN.

## TUD AR C'HOARI

AN TREMBLAI, kabiten Pempoull.

KERGOMAR, e letanant.

NORRIS, jeneral saoz.

WILFRID, ofiser saoz.

JAFREZ } soudarded d'an Tremblai.

HERVE }

JAKEZ AR ROUZ } kouerien.

LIL VRAS }

PAOL AL LUCH }

PER WEGAN } pesketaerien.

YANN BABOR }

YANN GERGOAD, danvez pried Janed Ar Rouz.

AR PERSON.

JANED AR ROUZ.

MARI WEGAN, he mamm.

NAIG }

KATELL } plac'hed ostaleri.

SOUADERRED GALL HA SAOZ, GWAZED HA MERC'HED.

## ARVEST KENTAN

*E Pempoull war ar porz, Pesketaerien war ar c'hal,  
merc'hed war dreuz o dorioù a sell ouz ur strollad  
listri a c'hortoz al lanv da dostaat ouz an aod.*

### PAOL AL LUCH

Sed aman c'hoaz brini all  
O tont d'ar vro da glask o freiz.  
N'hor boa ket a-wale'h gant ar Gall  
A-du pe a-enep ar roue,  
Ret eo ez afed da vro estren  
Da c'houlenn harp ar Spagnol kriz,  
Pe sikour ker ar Saozon fall.  
An daou hon touzo memes tra.

### PER WEGAN

Holl rendaelou an dud uhel  
Ne dalyont mann d'ar bobl izel,  
Na petra soñjal, a gav dit,  
Diwar ar pez a gouez warnomp ?  
Heskinet gant paotred ar roue,  
Kignet gant tud an dug Merkur,  
A be du trein evit kaout peoc'h ?  
Katoliked pe hugunoded  
D'ar paour zo ken ha ken didruez.

### PAOL AL LUCH

Ar beleg, en e gador-brezeg,  
A gomz bepred eus mad ar feiz,  
Met ar forban e servij Doue  
'Zo ken kriz ha lakez ar roue.

## YANN BABOR

Taolit evez ! Reun Gergomar  
Hag an Tremblai a zo erru.  
Mar deo heman treut e vrezoneg,  
Egile a zo eus ar vro,  
Ha, pa vez re hir teod un den,  
E c'hell talvezout ur c'hrouglas.

*Tevel a reont holl e keit ha ma teu Renan Gergo-  
mar hag an Tremblai war du ar c'hal, un nebeud  
soudarded d'o heul.*

### AN TREMBLAI

Kergomar, peur e vo gourlen ?

### KERGOMAR

A-benn un eur e c'hello Norris  
Degas e strolledou en douar.

### AN TREMBLAI

Daou vil pevar c'chant Saoz da lojañ !  
Nag ur blijadur 'vit Pempoulliz !  
Ganto n'omp ket karet iskis,  
Met ar Saozon a zesko dezo.

### KERGOMAR

Gwellañ tra d'ober, marteze  
'Ve reiñ da Norris Enez Vriad.  
Da Vriadiz, gwizien Verkur,  
Un tamm gwaskañ ne vo ket fall.  
Poent eo e chomfent hep hegall  
Na preizata war an aodoù.

Ur westenn saoz a-dreuz d'o genou.  
A viro outo krenn da fringal.

AN TREMBLAI

Aes faezan tud kastell Vriad,  
Re nebeut int da c'hallout herzel,  
Hag e-giz-se diwar hon tro,  
E kasimp an dud arall-vro.  
Harp en emgann 'zo mat da gaout  
'Vit ma chomo ganimp ar maout.  
Da vevañ diwar goust ar vro,  
E vimp, avat, a-wale'h atav.

KERGOMAR

Ne fell ket dit rannañ da brofit  
Gant neb az sikour da c'hounit !

AN TREMBLAI

Hag a zo gwir. Ken sellus on  
Hag ur c'rokant war-benn e wreg.  
Ne blij ket tamm din bezañ dogan  
Daoust ma kavan d'am giz merc'heta.

*Gwelout a ra JANEDIG AR ROUZ o tremen.*

Sell 'ta, Ronan. Nag ur goantenn,  
Gant he fodad laez war he fenn !  
Plac'hig, da belec'h ez it-hu ?

JANEDIG

Da gas al laez da di'r Paotr Du.

AN TREMBLAI

Livrit din ano ho tad ?

JANEDIG

Jakez Ar Rouz eus Runegad.

KERGOMAR

« Bravañ merc'hed dindan an heol  
Eo merc'hed Ar Rouz eus Pempoull.  
Janedig 'zo kaer 'vel ur rozenn  
An div all 'zo div rouzardenn. »

AN TREMBLAI

Ar rozenn eo a blij din-me !

KERGOMAR

Mab ar Gergoad he c'hutuilho ;  
A-benn eistez 'mañ o friko.

AN TREMBLAI

M'hen tou va le, an treid plat  
N'en do ket ar c'hentañ tañva.  
Ho pezet soñj, koantik Janed,  
Ganin e kouskot noz hoc'h eured.

JANEDIG

Noz va eured, — Ra viro Doue !  
'Vin gant va gwaz en e wele !

AN TREMBLAI

Dre heg mar ne deo a c'hrad vat  
E teuin a-benn d'ho toñvaat.  
Riskl ar brezel hag amzer c'hren  
A zo lod ar vrezelourien.

JANEDIG

Ne gomxit ket 'vel ur c'christen !

AN TREMBLAI

C'hwi 'roio din an absolvenn.

*Janedig, gant mall, a ya tre e stal ar Paotr Du.*

KERGOMAR

Feuket ganit ar plac'hig koant.

Re zichek e larez da c'hoant.

AN TREMBLAI

Amzer da goll me n'em eus ket  
Na gant menech na gant merc'hed,  
Koulz hag an emgann ar c'hoari  
'Rank bezañ renet dichati.

KERGOMAR

Ret kaout truez ouz an dud keiz  
A dalvez d'an daou du da breiz !

AN TREMBLAI

Amzer gollet magañ truez !  
Pa vezan stag gant ur banvez,  
Ne soñjan mui en deizioù naon.  
Ha n'on ket prest da vagañ kañv  
Evit ur plac'h am bo c'hoariet.  
Pa'z in da vreinañ 'barz ar vered,  
Evel ar sent, ar gwrac'hed fur,  
Hepken va ano war ur maen  
A roio meneg a'hanon.  
Bemdez o c'hoari gant an Ankou

E tapan un tamm joa a-wechoù.  
Mar tro da c'hlac'hар unan all  
Evidon-me ne deo ket fall.  
Pep hini e lod war an douar :  
Da lod gouzañv, sentiñ, krenañ,  
Ha da lod all lorc'hentez bevañ.  
Setu hepken 'zo tra an holl :  
Mont da vreinañ war-lerc'h an taol !

KERGOMAR

Setu bigi erru d'an aod.

AN TREMBLAI, *d'ur soudard,*

Kae 'ta, Jafrez, d'an ostaleri  
Ma vo degaset sistr diouztu,  
Hini divadez ! ha gwin ruz  
D'ar soudarded 'zo 'tont en douar,  
Ha merc'hed kaouen d'o servijañ.

*Ur vag a zo deut stok er c'hal. Tud a prezef, armel  
kran, dezo doare estren, a zeu er-maez.*

AN TREMBLAI

Bezit deut mat a-herz ar roue !

NORRIS

Salud deoc'h a-herz va rouanez !  
*Komz a ra ouz un denjentil a zo d'e heul.*

Wilfrid, dre ma touaro 'n dud  
Lakait o renkañ diouztu  
Ma'z ay pep strollad d'e lojeiz  
Da ziskuizañ bet' fin an deiz.

### WILFRID

Hag e vo graet, Aotrou Norris.  
Piv 'vo da vleniañ ar stolladoù ?

### KERGOMAR

Ar soudarded-mañ 'zo d'hon heul.

AN TREMBLAI, KERGOMAR ha NORRIS a ya kuit dre  
an tu kleiz. Merc'hed yaouank brokou pri melen pe  
staen, a-bouez o daouarn, a dosta ouz ar c'hal.

### JAFREZ

En dro-mañ, merc'hed, 'kavot fret,  
Paotred, blev ruz, dezo dent hir  
Hag en o c'hreiz ur galon dir.  
Ha mar deo striz genou o yalc'h,  
Da skeiñ ez int brokus a-walc'h.  
Gant ar re-mañ c'hwi 'zesko dañsal.

### NAIG

Peseurt kemm 'vo gant ar re all ?  
Leuniañ ar c'hob, tommañ ar gwele,  
Dic'hoantañ froudenn an targizier,  
War an douar setu va micher.  
Pe gant Jafrez pe gant William  
Eo din hen ober, ne ran forz,  
Nemet em bo Iod eus an dorz  
Hag eus an hanaf d'am dic'hoantañ  
Keit ha ma vin lezet da vevañ.

### HERVE

C'hwerda furnez, Naig vrav !

### NAIG

Daoust ha c'hwi 'zo laouen atav ?  
Pa vez kelou da vont d'ar gad  
Ne vezit ket war ho tu mat,  
Bep gwech. Ha pa vez trist ho kwin,  
Pa vreugeudit diwar re gofad,  
Ez eus en ho kreiz kalonad.  
Bara ar roue, gwin an dug  
A samm ho kalon a-wechoù.  
Mar deo plijus distagañ taolioù,  
N'eo ket laouen bezañ gwall aozet,  
Hag e kalon ar startañ paotred  
E sav, deizioù 'zo, keuz d'ar gér.

### JAFREZ

Ro peoc'h deomp gant da gaoziou !  
Te 'zo gwasoc'h eget ur person.  
Avañsetoc'h, avat, da sarmon  
Pa n'hellomp kemmañ doare bevañ.

### HERVE

Ret eo peuriñ e lec'h m'eur stag,  
Ha pa c'heller tapout ebat,  
Ez eo diot chom da sellet.  
Abred a-walc'h pa vimp lazet  
'Vo genaouegiñ ouz ar stered.  
Diskarg bremañ keit ha ma'z eus  
Ha deomp plijadur ken na freuz.  
Me n'on ket chalet gant warc'hoaz.

### KATELL

Na me kennebeut, Herve vrav.

Debriñ ar bara pa vez poaz.  
Mont d'ar gwele pa vez c'hoant kousket  
Ha d'ar c'hoari pa vezet pedet,  
Setu ar furnez am eus desket,  
Koulz gant ar Gall hag ar Breton.  
Heñvel e vo gant ar Saozon.

*Janedig a ya e-biou gant he fod-laez gouullo, mell warni pellaat.*

#### NAIG

Janed Ar Rouz, ha da friko ?  
A-benn eiztez emañ atav ?

#### JANEDIG

Na da ket da embann re uhel  
Ur seurt kelou 'n amzer vrezel,  
Naig ker. Rak ne oar den  
Gant warc'hoaz petra 'zo meret.

#### KATELL

Sur, eo erru ar sonerien  
El listri-hont e toull ar porz.  
Mar da da goll da Yann Gergoad  
Ne vanko dit a baotred vat.

#### JANEDIG

A baotred vat me ne ran van.  
N'em eus ezomm nemet unan.

#### NAIG

Ar gwasañ 'zo, Janedig kaez,  
Ganit ne vo ket goulennet  
Pe e plij dit pe ne ra ket.

Gant an amzer a zo warnomp,  
N'eus ken mestr nemet ar soudard.  
Salo na sello war da dro  
Ar re 'zo o vresañ ar vro !  
Fur ez eo dit mont d'ar gèr peim.  
Ar pennou ruz a zeu en douar  
'Zo c'hoaz reutoc'h eget ar re-mañ.  
Chom sioul ez ti, Janedig koant,  
D'aon na savfe gant unan c'hoant  
Da vont betek ennout da c'hoùt  
Ha blot eo golched da wele.

*Janedig a ya kuit. Ur strollad Saozon a dremen en ur ganañ.*

#### AR SAOZON

Pa yud ar bleiz e lez ar c'hoad,  
Eo en deus ezomm d'ober kofad.  
Pa ziskenn Saozon en un aod,  
Eo o deus c'hoant da gaout-o lod.  
Gwin Frañs, sistr Breiz, yod gwiniz du  
'Zo boued c'hwek d'ar pennou ru,  
Ha merc'het flour 'n ur gwele blot  
A bliñ da baotred dichipot.  
C'hwezenn ar stourm, gwin an orged,  
Silzig druz ha kig-moc'h rostet,  
Pep tra d'e boent, ha, mar deo ret,  
Klozañ ar sabad er vered.

*Diwez  
an arvest kentañ*

## EIL ARVEST

*E koumanant Runegad e kreiz miz Mae, Goude koan, emañ an dud bodet en-dro d'an daol pe war azel ar gweleoȗ kloz.*

### JAKEZ AR ROUZ

Neuze Lil Vras, hag ar c'heloȗ ?

### LIL VRAS

En enez Vriad 'z eus bet kannoȗ.  
Ar pennoù ruz gant Kergomar  
Hag an Tremblai, boued ar gounnar,  
O deus sailhet war an enezenn.  
Briadiz war o bigi skañv  
O deus tec'het prim dirazo.  
Skoet o deus da Vontroulez.  
Met difennourien ar c'hastell,  
Tregont anezo, 'zo bet kilhet.  
Kaer o deus bet enebiñ pennek,  
Re nebeut oant. Faezet int bet.  
Siouaz ! pa'z int 'n em zaskoret,  
An Tremblai didruez en deus lakaet  
Skourrañ pemzek 'vel torfedourien  
Ouz bannoù ar milinoȗ avel.

### JAKEZ AR ROUZ

Ne gaver mui truez gant den.  
Briadiz, evidomp zoken,

Oa amezeien ouzpenn diaes.  
Diskenn a raent en aod alies :  
War zigarez difenn ar feiz,  
Laerez a-zehou hag a-gleiz.  
Nemet bremañ gant ar Saozon  
Hon eus kavet gwasoc'h laeron.

### MARI WEGAN

Dalc'hmat e riskl eus hor buhez  
Pa ne deo ket eus hon danvez.  
Tamm peoc'h ebet d'un deiz d'an all.  
Atay e tro an traoȗ da fall.  
N'eus abeg d'echuiñ ar brezel  
Keit ha ma vo kavet da sevel  
Tra pe dra, diwar goust an dud.  
Pa zeu betek enno ar brud  
Ez eus, e lec'h pe lec'h, madoù  
Da skarzañ, pe ur bennhêrez  
Da skrapañ, e tered ur vandenn  
Da wallaozañ ar gristenien.

### LIL VRAS

N'ouzon pe soñj 'zo en Tremblai :  
A-vec'h distro eus enez Vriad,  
Emañ, war zigarez chaseal,  
O kildreiñ war dro Runegad.

### JAKEZ AR ROUZ

Ar gwall baotr-se a zo douget  
Kement ha d'ar stourm d'ar merc'hed.  
Moarvat en deus paret e sell  
War ur baourkaezig turzunell  
A ziwar-dro. Ne vo ket aes

D'he zud he diwall ouz ar sparfell.

YANN GERGOAD *a zeu tre, e dog en e zorn.*

Tapet eo koan ?

JAKEZ AR ROUZ

Ur pennad 'zo.

Met petra 'zo 'c'hoari ganez ?

Ur c'heloù fall a zegasez ?

YANN GERGOAD

Kelou ebet... nemet an Tremblai,

A oa er waremm gant e floc'h

Oc'h ober ged 'tal un toull broc'h,

A zo staget da c'hoarzin goap.

« Yac'hoc'h 've dit chom er Gergoad

Pe gant da ler e savo keuz. »

Emezañ, gant ur vouez rok,

En ur leûskel un tenn em zog.

Sellit an toull a zo ennañ !

*Jakez Ar Rouz a sell gant enkrez ouz e verc'h,  
deut da gaout he c'harantez ha mantrret an tamm  
anezi o sellout ouz an tog toull-didoullet.*

JAKEZ AR ROUZ

Aon am eus da gompreñ re vat

Piv emañ o klask er c'hornad.

*Stagañ a ra an holl du sellout ouz Janedig. Den ne  
rann grik avat.*

JAKEZ AR ROUZ

Furoc'h e vo dit, Yann Gergoad,

Chom amañ betek tarz an deiz.

Pa vez deut, eus e doull, ar bleiz,  
Ne da ket war vale an dañvad.  
N'hellomp holl nemet pediñ Doue  
Gant ar spi ma vezimp espernet  
Gant tud an dug ha re ar roue...  
Hag E volontez bezet graet !  
Emaomp, evel pell en avel,  
Etre daouarn an dud a vrezel.

MARI WEGAN

Ma ! koulz eo deomp mont d'hor gwele.

*da Yann ha Janedig.*

C'hwi ho-taou a c'hell chom aze  
Da veilhañ kichen-ha-kichen.  
Ne deo ket poent mont da bournen.  
Mat e vo gwelout ar person,  
Jakez, e sell ma vo disul  
Renkel kement tra e feson.  
Ret eo disamman o c'halon  
Eus an enkrez hag ar spouron,  
A drenk o levenez bevañ.  
Peadra 'zo da ziskiantañ.

*An holl a ya kuit, nemet an daou zen yaouank a  
chom e-kichen an daol.*

YANN GERGOAD

Sammet on, Janedig karet,  
Gant un enkrez n'oufen laret.  
Ken dinerz ez en em santan  
Ha, dirak ar bleiz, un oan.  
Na me 'garfe bezañ soudard !

JANEDIG

Ret eo bezañ laer pe vastard  
Evit mont en ur seurt micher !

YANN GERGOAD

A c'hell bezañ... met pa ouzer  
Ober gant an akebutenn,  
Ar c'hleze hag ar bistolenn,  
E c'heller rediañ d'an doujañs  
Ar riblaerien hag ar vittañs  
A zeu war-dro ar re 'garit.  
Met ne don nemet ur chouer,  
A rank bepred piegañ e gein  
Da yev ar re a zo war lein.  
Kement se 'zo re 'benn ar fin,  
Ha dre forz kas dour d'ar vilin,  
E tremeno dreist ar vardell.

JANEDIG

Ne deo ket yac'hus chom re bell  
Da veskañ soñjou dre ar penn.  
Pa n'hellomp tra n'eus nemet gortoz  
Ma torro da vat war an arnev.

YANN GERGOAD

Na kaer e tigore ar vuhez  
Un nor evurus dirazomp !  
Ha bremañ n'eus nemet gourdrouz,  
Anken ha doan a bep tu.

JANEDIG

Kas kuit pelloc'h ar soñjou du.

Bez, da galon sioul, em c'hichen.  
Ra lezi ar peoc'h da ziskenn  
En da galon re strafuilhet,  
Ma c'hellin adarre gwelet  
O vleuniañ an evurusted  
En da zaoulagad evel kent.

YANN GERGOAD

Karout a rafen sentiñ ouzit,  
Met va c'halon a zo re sammet.  
Drouksantout a reomp ar gwalleur  
O plavañ warnomp da bep eur.  
Re griz eo planedenn un den :  
Bezañ evel-hen disouten !  
Penaos kaout harp ouz ur mestaol  
Pa'z eo ar vistri eo hen gra ?

JANEDIG

Ret eo kaout fiziañs memes tra.  
Ar garantez am eus dit roet  
Biken gant den ne vo diframmet.  
Gallet e vo gloazañ va c'horf,  
Va ene avat 'chomo dizalc'h.  
Setu a dle bezañ a-walc'h  
Evit habaskaat da spered.

YANN GERGOAD

Gouzout a ran mat, va ene,  
Pegen douget ez out din-me.  
Holl emañ va freder ennout,  
En desped din, avat, e krenan  
'Vel ur minoc'h rak ar gavan.  
Leun-barr an deveziou da zont

A c'hwervoni koulz hag a spont.  
Deut eo ar vuhez d'un ifern.  
Bemdez e taoler war ar bern  
Ur bodad prez, un hordenn spern  
'Vit ma strako krisoc'h an tan  
Dindan ar paour kaez ampreyan.  
Pegeit e pado an abadenn ?

JANEDIG

Un dra aner ez eo goulenn.  
Emaomp etre daouarn Doue.

YANN GERGOAD

Ha dindan treid tud ar roue.

JANEDIG

Paotred an dug ne dint ket gwell.

YANN GERGOAD

Ret ec'h echufe ar brezel,  
Ma'z afe kuit holl da lec'h all  
Mignoned euzus an tan-gwall.  
Hag e c'hellimp stagañ adarre  
Da labourat, da vevañ eeun,  
E peoc'h glan ar vuhez leun.

JANEDIG

Bepred e c'hortoz hor chalonoù  
Ur peoc'h na zeu nemet a-wechoù  
Betek ennomp evit ur predig.  
N'eus nemet un dra, va c'haredig,  
A zo diarvar deomp non-daou :  
Va c'harantez ha da hini.

— 380 —

Na gant kleñved na gant kozni  
Ne vo gallet ober gaou  
D'an deneridigez a gren  
E lammoū klouar hor gwazied.  
Disul a zeu e vi va fried.  
Ne fell din soñjal e tra all.  
Va fiziañs gredus 'chom divrall  
Ouz gourdrouzoù kriz ar vuhez.  
Gra eveldon, va ene ! Lez  
Da zorn em hini 'vit ma teuio  
Da zigeriñ e don an noz  
Levenez dilavar ar repoz  
A gaso kuit kridienn an enkreiz.  
Selaou ouz lanv hor c'harantez  
O sourral evel mor en aber  
War-du ar runiou a weler  
Er pellder, stok ouz an neñv.  
Hor c'harantez a zo ken kreñv  
Ma n'hellan mui doujañ ar marv.  
Betek er bez me da garo !

*Diwez  
an eil arvest*

— 381 —

## TREDE ARVEST

*Lodenn gentañ*

*En iliz parrez. Emañ oferenn eured Janedig Ar Rouz ha Yann Gergoad o paouez echuiñ. Aet eo ur person d'ar sakristiri. Lil Vras a zeu betek Jakez Ar Rouz, mall warnañ.*

### LIL VRAS

An Tremblai gant e soudarded  
'Zo erru war-du ar vered.

### JAKEZ AR ROUZ

Ret eo buan serriñ an dorioù  
'Vit na c'hellint dont e-biou.  
Kae dillo da laret d'ar person.

*Lil Vras a ya d'ar sakristiri, Jakez Ar Rouz ha tud an eured a brenn dorojou an iliz.*

### YANN GERGOAD

Pelec'h da guzañ, va Janedig ?  
Re ziwezat eo evit tec'hout.  
Koulskoude 'kayfen kant gwech gwell  
War al lec'h, en un taol, mervel  
Eget gwelout o daouarn warnout.

### JANEDIG AR ROUZ

An dañjer am eus drouksantet  
En dro deomp, va muiañ karet,  
N'eus tu ebet da vont dioutañ :  
Stag eo ouzimp evel hor skeud.  
Eured da sul, eured da wener,  
Se ne ra mann. Dalc'hmat e tizer  
Ar pal eürus pe reuzeudik  
A zo het a-viskoaz tonket.  
Da bried on, va Yann Gergoad.  
Forz petra 'vo, da bried 'vezin  
Ha dit hepken, betek ma varvin.

### AR PERSON

Panevet saotrañ da zilhad  
Az lakfen en un arched koad  
A zo e penn ar sakristiri.  
Ennañ moarvat ne furchint ket,  
Hag e-keit se e vo gallet  
Troadañ gevier dezo marteze.  
Doue 'hardono ar pec'hed-se.

### JANEDIG

Hag hoc'h eus damant d'am dilhad  
Pa ouzoc'h pe reuz am gortoz ?  
Gwell 've ganin en un tantad  
O zeurel holl bremañ-souden  
Ha bezañ er gér gant va den.

### YANN GERGOAD

Kae prim, Janedig, Klevoui a ran  
Chwez ar poultr. Tanet an tarz.

A-benn ur pennad emaint e-barz,  
Divarc'het ganto dor ar porched.

*Janedig a zo tec'het d'ar sakristiri. Un darzadenn  
vouzarus. Dor ar porched a gouez e diabarz an iliz.  
Tud an eured a zo aet holl du repaiñ e-kichen dor ar  
sakristiri. Emañ leun ar porched a soudarded tokar-  
net o fenn, sabrinier ha pistolennoù ganto en o  
daouarn. An Tremblai a zeu e-barz da gentañ.*

AN TREMBLAI

Pelec'h emañ an Aotrou person ?

AR PERSON

Setu un doare difeson  
D'ur c'christen da zont en iliz,  
Aotrou Tremblai. Daoust hag ar c'his  
A zo erru d'ober da Zoue  
Evel a rit d'hoc'h enebourien ?

AN TREMBLAI

Ma vije bet dibrenn an nor  
N'am be ket bet da c'houlenn digor.  
Met sed amañ tud an eured.  
Nag e pelec'h emañ Janed ?

AR PERSON

N'eo ket un eured am eus graet,  
Ur vadiziant ne laran ket.

AN TREMBLAI

Ur vadiziant n'hoc'h eus ket graet,  
Aotrou person. Ar gwaz nevez

A welan a zo Yann Gergoad  
Ha ne gredan ket e ve tad  
Ur c'christen ken mat kent eureudiñ.  
Pelec'h 'mañ Janed, ma pokin dezi ?  
*Soudarded, aet-tre er sakristiri, a zeu en-dro.  
Janed d'o heul.*

AN TREMBLAI

Ne deo ket fur, Janed Ar Rouz,  
Choari kuzetañ ouz da bried.  
Peogwir e rez se, deiz da eured,  
E ri gwasoc'h pa vezi pedet.  
Deus war dalier va jay da bournmen.  
Me a zalc'ho tost dit, bez serten !

JAKEZ AR ROUZ

Aotrou, mar doc'h ur gwir gristen,  
Na dit ket da laerez ar verc'h  
Digant he zud hag he fried.  
Soñjit er re hoc'h eus karet !

AN TREMBLAI

E ve da verc'h gant Yann Gergoad  
Pe ganen-me, petra 'ra dit ?  
N'eus forz penaos, ael e vo kuit.  
Lez anezi da vont 'n he hent  
Ha kae d'ar gér hep treiñ da benn.

AR PERSON

Aotrou Tremblai, ar gwall dorfed  
Emaoc'h oc'h ober ho sammo  
Er bed all mar ne ra bremañ.

### AN TREMBLAI

Keit ha m'on bev, eus ar bed all  
Ne ran foutre. Hep tabutal,  
Lezit ar plac'h, hag holl er-maez.

*Ar soudarded a dap krôg e tud an eured d'o boun-tañ dichipot war-du ar porched. Ne chom en iliz nemet an Tremblai, ar person ha Janedig.*

### JANEDIG

Aotrou person, kent din monet  
D'ar reuz hudur, 'zo din tonket,  
Galvit bennoz Doue warnon !

### AR PERSON

Kae, va merc'h, ha bez diazon.  
Gant sikour hor mamm, ar Werc'hez,  
E tougi da reuziad enkrez,  
Betek gounit ar baradoz.

### AN TREMBLAI

Estreget poan az po da c'hortoz,  
Koantenn vlezik ! Nag un afer  
Evit kaout, e-lec'h ur c'houer,  
Un denjentil en da wele !  
A-walc'h a gaoziou ! Deus alese !  
*Hag e tap krôg en he dorn d'he c'has d'e heul.*

### TREDE ARVEST

#### *Eil lodenn*

*Er vered dirak an iliz. Ar soudarded o deus kaset an dud er-maez. Floc'h an Tremblai a zo o vont da sevel Janedig war dalier jav e vestr, Yann Gergoad a weler e toull an nor-volz, daou soudard o fistolenn buket warnañ.*

### JANEDIG

Aotrou Tremblai, me ho ped,  
Va list da vont da zor ar vered  
Da laret kenavo d'am pried.

### AN TREMBLAI

Kenayo dezañ te a laro  
Koulz ac'halen hag ac'hano.

### JANEDIG

Yann Gergoad, mar deuan en-dro  
Daoust ha c'hwi c'hoaz am c'hemero ?  
Ne vezin mui ur plac'h direbech  
Evel bremañ, va muiañ karet.  
Eus ar pez a vo c'hoarvezet  
N'on kiriek ha va zourmant  
A vo diremed mar kavan  
Ho karantez lazet en distro.

### YANN GERGOAD

En desped dit eo e kimiadez,  
Hag en distro va c'harantez  
A gavi ken bev ha bremañ.  
Mar bez glac'har leun hor c'halon,  
Hon-dou hen dougimp e feson,  
Ma vo skañvoc'h war da ene  
Moustr dinatur ar wall huñvre.

### HERVE VRAS *da Jafrez*

A-benn ur sizun pe bemzektez  
E vo skuiz ar mestr gant hounnez.  
Hi 'vo hol lodig ar friko,  
Pa vo dic'hoantet hon Aotrou.

### JAFREZ

'Vel just ne rin ket va beg figus  
Nag ar babored all kennebeut,  
Pa vo roet deomp da vatez  
Ur plac'h flour evel ur bolez.

### JANEDIG (*klevet ganti an daou soudard*)

Aotrou Tremblai, prometit din,  
War hoc'h ene, e tistroin,  
A-benn nemeur, da di va zad.

### AN TREMBLAI

Promesa ebet ne rin dit,  
Janedig koant. A zeiz da zeiz  
Me 'ren va bubez evel ur bleiz.  
Me n'ouzon ket ha bev 'vin c'hoaz,  
Pa ziguzo an heol warc'hoaz.

Ober a ri fur o kimiadañ,  
Hep soñjal distreiñ amañ  
Nag er sun nag er miz kentañ.

### JANEDIG (*dezi hec'h-unan*)

Mar deo ur seurt bubez va lod,  
N'hellin mui dont da c'houlenn bod  
Pa vezin-me deut d'ur strouilhenn  
Penaos seveniñ al lezenn ?  
Mirout va bubez evit riklañ  
Da bep nozvez gwasoc'h-gwasañ  
D'un hudurniez a lazo  
Pep elfenn naet em ene bev ?  
Gwell eo ganen mont glan d'an ifern  
Eget saotret d'ar baradoz.  
N'em eus tamm truez da c'hortoz,  
Na spi ehet ken da espern.

### *d'an Tremblai*

Aotrou, teurvezit reñ din  
Ho pognard e zornell aour fin  
Ma troc'hin va seizenn eured,  
En eñvor ac'hanon d'am pried.

### AN TREMBLAI

Ur soñj seven eo, Janedig,  
Ober ur prof d'az karedig.

### *Dic'houinañ a ra e c'hougleze da reñ dei.*

Dezañ e vezoo da seizenn  
Ha me 'gutuilho da vleunienn.  
Rannet-mat e vo da zanvez.  
Setu o tont dit ar furnez.

*Janedig a sank ar gougleze en he c'halon hag a  
gouez d'an douar.*

HERVE VRAS (*soublet warni*)

Maro mik eo, Aotrou Tremblai.

AN TREMBLAI

Laeret on bet gant ar follez !  
Da Yann Gergoad he c'has d'e gêr  
Da welout hag e bried feal  
A dommo e wele, pell hag all,  
Gant he c'horf darev 'vit ar vered !

JAFREZ

Mar grafe heñvel an holl verc'hed  
N'eo ket alies e ve ebat,  
Goude 'n emgann, d'ar baotred vat !

AN TREMBLAI

Deomp d'ar c'hastell ha difreomp.  
N'hon eus mui tra d'ober amañ.  
Gant ur strakell evel houmañ.  
Chañsou all, avat, a gavimp.

*Mont a ra kuit gant e soudarded.*

YANN GERGOAD kemeret gantañ Janedig etre e zivrec'h.

Ene glan, setu-te nijet  
Pell diouzin, gant da gened  
Ha da zouster, dinamm miret  
War goust da vuhez hag hon eurvad.  
Ne chom ganeomp nemet kalonad  
Ha gervel warnout truez Doue.

*Holl dud an eured a zo deut en-dro d'ar c'horf, ar  
wazed diskabell hag o pediñ :*

AN HOLL

Doue 'bardono d'hec'h ene !

Diwez

14/7/42

## SPERED BRO JAPAN

gant Arzel Even

Setu bremañ tremen c'hwech' miz ma tarzas an tangwall war aodoù ar Mor Habask. Kosañ broad ar bed, war var bezañ mouget gant enebourion didruez, he doa kroget er c'hlaze evit difenn he gwir. Hag an enebourion-se, a oa stad enno o lavarout ne rafent nemet ur begad gant Bro-Japan, a gouezas buan o biz-meud en o dorn. Evel un taol-kurun e plavas al listri hag ar c'hirri-nij japanat war an holl vroioù e dalc'h o enebourion ; e-giz ur goabrenn girvi-raden e tiskennas soudarded ar Mikado en Inizi Filipinas, e Malezia, e Java ; ha bremañ eo skarzet an estren diwar rann vrasañ ar Reter Pellañ, hag emañ al listri japanat o c'hoari adal an Inizi Aleoutiat betek Madagaskar, da lavarout eo war un hedad a c'hwezek mil kilometrad. Biskoaz ne voe gwelet trec'h ken trumm war un dachennad ken ec'hon. Kalz warlerc'h eo lezet kurioù Japaniz a-enep Rusia e penn kentañ ar c'chantved, o dije dleet koulskoude lakaat un tamm furnez e penn paotred ar Potomac. Souezet eo ar bed ur wech adarre gant ar soudarded velen bihan-se ma hañval bezañ ken aner herzel outo hag ouz ur reverzi-mor. Ha m'am eus kinniget ober ur hrezegenn a-zivout an dud-se eo end-eun evit klask ganeoc'h abegoù ur gourzrec'h ken sabatuus. « Spe-

red Bro-Japan » evel m'eo bet lavarout deoc'h ; se a ziskouez petra a fell din ober : n'eo ket va menoz lavarout deoc'h petra a vez debret du-se, pegen dudius bennak e ve ; — da gentañ, pa n'on biskoaz aet-di, anat deoc'h, ha da c'houde pa n'eo ket se a garfen : klask displegañ perziou mat ha fall ar bobl japanat, penaos int bet stummet a-hed ar c'chantvedou ha pere eo abegoù an trec'h emaomp o welout hiziv, ne laran ket.

« Pa vo sanket en ho penn ne c'hellit kompreñ Japaniz e doare ebet, neuze e stagot d'o c'hompreñ un tammig. » Ar c'homzoù digalonekaus-se a lavare ur c'heneil japanat d'ar skrivagner brudet Lafcadio Hearn. Un den souezus a-walc'h e oa ar skrivagnerse, ganet e 1850 en enez Leukas eus un tad iwerzonat hag ur vamm c'hresian ; abred-kaer e veajas, hag en diwez e teuas da Vro-Japan, lec'h ma voe broadet hag anvet da gelenner war ar saozneg. An eurvad en deus bet da vevañ e Bro-Japan d'an ampoent endeeun m'edo houmañ o kemer youlek hent ar Bremañaat ; ha displeget en deus kement en doa gwelet, meizet, — ha diouganet ives, — en un nebeut levriou dudius-bras ha skrivet en un doare hoalus-tre : « *Bro-Japan* », « *Bro-Japan dianav* », « *Eus ar Reter* » hag all. Mervel a eure e Tokio e 1904. Ha daoust d'ar c'hemmoù bras c'hoarvezet abaoe e buhez Bro-Japan, e chom c'hoaz e levriou andon pennañ an anaoudegez a c'heller kaout eus ar vro-se hep mont di.

E-touez tud Europa o deus Japaniz ar vrud fentus da ober pep tra war an tu gin, — da lavarout eo, an tu n'omp ket boas ober gantañ. Skeiñ a reont eus an diavaez war gleier — divazoul ; an amenuzerion a

sach an heskenn hag ar rabod daveto e-lec'h o boun-tañ ; ar merc'hed a neudenn un nadoz o lakaat ar graouenn war an neudenn, ha me ' oar. Traouigoù dister, hogen traouigoù arouezius eus un temz-spered, un urziadur kevredigezel a hañval dimp aet war eilpenn, ha na vimp biken evit kompreñ peurvat, evel ma lavare ar Japanad ma komzen anezañ bremaik.

Un nebeut pennadoù brezonek diwar-benn Bro-Japan a zo bet embannet dija, dreist-holl unan du-dius gant Maodez Glanndour war Walarn bloaz hanter 'zo. Lavarout a rae e weler daou du e temz-spered Japaniz : un tu gwregel, sevended, blizidigez, habaskter, lemmer spered ; hag un tu goure, kadarnded, lealded, karantez ouz ar vro hag an Impalaer ; spered ar Vousmeenn ba spered ar Samourai mesket ha kempouezet mat. Gwir eo e meur a gēñver ha marteze e c'hellomp klask abegou hag andoniu an daougelez-se.

Re vuan ez ankounac'haer, pa studier istor ur vro, ha dreist-holl pa glasker e ziskleriañ, pegen pouezus eo anavezout levezón ar relijion war spered ur bobl : a zo gwir dreist-holl pa'z eo ur relijion vroadel evel m'eo hini Japaniz ; dre studiañ o relijion eo e c'hellimp marteze gwelout skaer a-walc'h e kevrin o zemz-spered.

N'anavezer ket gwall-vat — pe gentoc'h n'anavezer tamm ebet — orin ar bobl japanat. Gouez da zenoniourion 'zo, e veze ganet Japaniz diwar kemmesk Mongoled ha Malaiz ; hogen ret eo anzav ne gaver ket en o zemz-korf nag en o zemz-spered kalz a dra da harpañ ar goulakadur-se, daoust ma'z int moda-raerion ampart evel Malaiz, disheñvel e-se diouz

pobloù all ar Reter pellañ ; hag o yez n'he deus mann da ober na gant ar mongoleg na gant ar malaeg, — na gant yez all ebet ; eur yez diouti hec'h-unan eo. Bezet a vez, ne c'heller ket krediñ e veze Japaniz henvroiz o enezeg : dizarbennet o deus etrezenek douarou yen an Hanternoz an henvroiz wirion, an Ainoued (1), anezo gwenngroc'heneion hanterouez, hemolc'herion ha dreist-holl pesketaerion, brudet evit hirder ha puilhder souezus o barv hag o blev, ken blev-penn, ken blev-korf, hag a ya da get tamm-ha-tamm hep en em veskañ gant an argaserion. Gwall-goz eo sur a-walc'h aloubidigez an enezeg gant Japaniz, dic'hallus avat reiñ dezi un amzeriad resis ; ne vern, ahendall.

Pa annezas hendadoù Japaniz er vro ma vev bremañ o gourvibion, gwall-sevenet ne oant ket, hervez doare ; hogen ganto e kasent ur relijion dezo o-unan, koz-meurbet hep ket arvar, rak chomet e oa er stad kentañ m'o deus tremenet drezi an holl relijionou : kehelerez an hendadoù an hini oa ; hag ar relijion-se eo c'hoaz hini Japaniz bremañ, dindan an anv « chinto », da lavarout eo « an Henti ». Menoz ar relijion-se eo e kendale'h ar re varv da vevañ ur vuhez damheñvel ouz hini an douar, da gaout darem-predou gant ar re vev, ha zoken da bleustrin an tiez ma vevent enno. Ret eo d'ar re vev soñjal en o c'hen-tadoù marv, kinnig dezo meuziou, diedou, traezou a bep seurt evit ma vezint eurus er bed all ; ma ne

(1) « Ainou » eo an any gwirion a roont dezo o-unan, da lavarout eo, « an dud » ; — evel kalz gouezidi pe zamouezidi e kav « ez int an dud n'eus nemeto ; alien avat e reer anezo « Aino », un any a ro dezo Japaniz (ar re-se divarv ha blouc'h peurliessañ) evit ober goap ouz o c'horf blevek, « aino » o talvezout kement ha « kolen-ki » e japaneg.

reont ket kement-se, gwa dezo ; ra c'hortozint an hell walleurioù ; ma reont, e vezint karet ha gwarezet gant an anaon. An holl bobloù o deus anavezet ar gredenn-se, ken naturel ha ken frealzus, ha n'eo ket kollet a-grenn gant ar re sevenetañ zoken : pa lakaomp bleunioù war beziou hor re varv e kredomp mui pe vui ober plijadur dezo, ha n'eus ket keit-se, e meur a vro eus Europa e veze roet c'hoaz predoukañv d'an anaon, da vareoù 'zo da nebentañ. Da gredin eo e veze lidet da gentañ gant Japaniz azeulerez ar gourdadoù war ar beziou end-eeun ; abred-mat avat e voe dilezet ar boaz-se, hag an ti a zeuas da vezañ an azeulva. Moarvat e veze da gentañ ar boaz, pa varve unan bennak, lezel an ti a-bez gant an hini mary ha mont da sevel un ti all pelloc'h ; goude-se e voe kemeret ar boaz sevel un ti bihan war ar bez ha mont da lidañ ar relijon en ti-se (pez a vez graet c'hoaz a-wechoù ; « *moja* » a reer eus an tikañv-se) ; en diwez e voe graet al lidoù en ti e-unan. Dont a reas ar c'his, — bout a-walc'h dindan levezon Bro-Sina, — kaout e pep tiegez ur voestig ma lakaed enni laonennou-koad, skrivet warno anvioù re varv an tiegez : da aoter e talvez ar voest-se, ha dirazañ e vez pedet ha graet al lidoù, al lidour o vezañ ar penn-tiegez, evel just. Krediñ a ra Japaniz e chom eneoù ar re varv pep hini e-barz an daolennig a zoug e any, hag e kemeront ur perz kevrinus, met diarvar, e buhez an tiegez : laouen e vezont gant eurvad ar re vev, trist gant o zristidigez, ha droug a sav enno pa vezont dilezet pe pa welont o bugale o treiñ da fall.

Aes eo merzout heuliadou ha levezon ar gredenn-se. An hinienn n'eus ket anez i e sell ar gevredigez :

an tiegez eo an unanenn a gont. Ha peogwir ne c'hell nikun bezañ eürus er vuhez all ma ne lez ket mibion war e lerc'h d'e gehelañ, ret-holl eo dimeziñ, kaout kalz bugale ha dreist-holl mibion, — rak ar merc'hed ne c'hellont ket seveniñ al lidoù. Dianav-krenn e oa an dizemezded e Bro-Japan gwechall, ha bremañ c'hoaz ez eo rouez-tre. Pa veze gaonac'h ur wreg e veze aotreet ha zoken kemennet d'he fried, pe kas anez i kuit ha dimeziñ gant unan all, pe kemer ur serc'h pe meur a hini, pe kemer un advab ; — bremañ n'eus mui nemet an trede doare a vez aotreet. Pa n'en deveze un den nemet merc'hed, e ranke adva-bañ gwaz e verc'h henañ. Ur gwir veleg e oa an tad-tiegez, hag evel e pep kevredigez koz e oa mestr hollveliek war ar re all — dibaoù e oa dezañ evelato treuzimplij e c'hallaoud, rak aon da feukañ an hendoù ; ar gwir en doa koulskoude da lazañ e vugale pa raent un dra bennak a-enep an tiegez ; — un dlead e oa neuze zoken. Pa zimeze an dud yaouank, n'eo ket i a zibabe o fried, o zad an hini oa ; pez n'eo ket souezus, peogwir e oa an dimeziñ an dever sakr dreist pep tra, an never e-keñver ar gerent hag ar gourdadoù. Souez ebet kennebeut ma veze ha ma vez c'hoaz ar garantez ouz ar gerent trec'h a-bell war ar garantez ouz ar wreg hag ar vugale, ha ma vez ken naturel ha ken boutin an emroüsted hag an emzale'husted. Ha peogwir eo an ti azeulva ha neved an tiegez, anat eo e tremene d'ar mab henañ, tonket da vezañ lidour goude mary an tad.

Tamm-ha-tamm aval, endra ma kreske ar boblañs ha m'en em astenne ar gevredigez, e troe ar gredenn diegezel da gredenn gevredadel ha broadel. War bouez kreskiñ hag en em astenn e tro an tiegez da

goskoriad pe *Uji* ; ha kentadoù ar goskoriad a zeu da vezañ doueed boutin an *Uji* pe *Ujigami* (« kami » = doue). A-wechoù all en em astenn an tiegez dre stagañ outañ tiegeziou all, ha neuze eo kentadoù ar pennrener, pe ar pennrener e-unan goude e varv a ya da *Ujigami* hag a vez azeulet gant an holl, a gendalc'h ives evel just da enoriñ o zadoù-i. Ha pa voe unanet da vat pobl Bro-Japan a-bez dindan beli un impalaer, e teuas hendadoù tiegez hemañ da vezañ doueed holl Japaniz, — hag a zo c'hoaz, peogwir ez eo dalc'hmat an hevelep rummad-impalaerion a ren war Vro-Japan. Ac'hano hep mar darn vrasañ ar perziou souezus e welomp ganto : ur gwir zoue eo an Impalaer, pa ziskenn eus an doueed, ha dispar eo karantez hag emroûsted Japaniz gwechall evel Japaniz bremañ ouz ar Mikado, a zo evel ar Vro emzennaet, e c'hellfed lavarout ; ha ma kar ar Japanad e gerent dreist e wreg hag e vugale, e kar e vro hag e impalaer dreist e gerent. Rouez e vez komzet gantañ eus an dlead, rak n'en deus pal ebet er vuhez nemet an dlead. Ma tle pep den en em aberziñ evit e diegez, e tle pep tiegez en em aberziñ evit ar vro : diforc'h ebet enta etre ar relijon hag ar garantez-vro, etre sentiñ ouz al lezenn ha sentiñ ouz an doueed : ur relijon vroadel er ster resisañ eo ar *chinto*.

Ahendall e veze sellat ouz ar gevredigez japanat evel ouz un tiegez ledanaet, hag ouz ar Mikado evel an tad-tiegez : ur stad uheldadel e oa enta, hag hollveliek e oa ar Mikado war e sujidi evel an tad war e vugale. Ha pep tra er stad evel en tiegez a oa divizet dre ar munut gant ur reizadur didruez. En tiegez e oa ret d'ar vugale yaouankañ doujañ o henaurion ha sentiñ outo : er gevredigez e oa ret d'ar gonerion,

d'ar vicherourion ha d'ar genwerzourion (2) sentiñ ouz tud ar renkad kentañ, ar soudarded a vicher pe Samouraied, lakaet da vreudeur henañ, ha doujañ anezo koulz e komzoù hag en oberoù. Divizet e oa gant ar yez peseurt raganvioù, anvioù-gwan ha rakerbou a dileed implij o komz ouz hini pe hini hervez e renk, e oad, e reiz, h. a. ha re an den a gomze : ha kement-se dindan boan a varv a-wechoù, pa oa aotreet d'ur samourai lazañ raktal hag hep marc'hatañ nep piv eus ar renkadoù all a oa diseven en e genver. Evit pep renkad tud e oa merket en a-raok penaos e tlee pep hini ren e vuhez, diouz e leve : da skouer, arabat d'ur gonideg a oa e leve a 100 *kokourez* ar bloaz sevel un ti, dezañ ouzpenn 60 troataad hirder ; arabat dezañ dougen dilhad seiz, ha pa zimeze e verc'h reiñ dezi ouzpenn un aveler ha kinig d'ar gouvidi ouzpenn tri seurt kig : hag evel-se penn-da-benn ha dindan kastizoù garv. Kriz-meurbet e seblant dimp seurt lezennoù ; a galon vat e veze sentet outo evelkent, ha se en deus boazet Japaniz ouz meur a berz mat : espernegez, dilontegez, diginklerez en o ziez hag o dilhadou ; ha daoust d'al lezenn-se bezañ torret abaoe pell 'zo, e chom c'hoaz ganto ar pleg mat kemeret gwechall diwar he levezon.

An hinienn, evel m'em eus lavaret, ne oa ket anez e sell al lezenn : an tiegez hepken a oa anavezet, — a oa reiz-tre, peogwir e oa eñ ar boud peurbadus, an unanenn wirion (start-tre e menoz Japaniz eo ar pez a anv prederourion 'zo « spered ar wenaneg »). Gant

(2) Sellat e veze ouz ar re-mañ (ar genwerzourion) evel ar renkad izelañ, pegen pinvidik bernak e c'hellfent bëzañ, gant dismeganus ma oa Japaniz gwechall ouz an aferiou a arc'hant.

se, pa veze graet un torfed bennak, tiegez an torfedour a-bez a veze sellet outañ evel kiriek, ha barnet d'ar marv, pe wasoc'h c'hoaz d'an harlu : — gwasoc'h c'hoaz, rak un den pe un tiegez harluet e-maez e vro ne c'helle bezañ degemeret e kér ebet, ne c'helle ober micher ebet ha ma ne felle ket dezañ mervel gant an naon e ranke goulen an aluzon pe mont da « *eta* », da lavarout eo paria, ha ne oa ket brav ar stal gant an *etaed*, rak ne veze ket sellet outo evel tud (« *hinin* » pe « *nann-dud* » a veze graet anezo ives) ; ober a raent micherioù displijus evel bourevion, toullerion-veziou, skuberion ha dreist-holl kivijerion, ha pep hini a c'helle o lazañ hep dellezout estreget un dell-gastiz. Un tammig evel-se edo kont en Europa ar Grennamzer gant an dud eskumuniget.

Religion ar *chinto* koulskoude n'eō ket anezi azeulerez an hendadoù nemetken : doueed he deus ives, hogen un darn vras anezo diveret diouz an azeulerez-se, rak en diwez ne deo an doueed nemet an anaon aet da *g-Kamied*, da lavarout eo da speredoù kalz galloudusoc'h eget ar re vev. Ret eo lavarout ouzpenn ne oa ket ar seurt kehelerez hepken a rae religion Henjapaniz : douelaet o dōa pep tra, pe gentoc'h roet un doue annezer da bep tra : darvoudou an natur, darvoudou buhez mab-den, an holl vicheriou, an holl draezou ha binvioù a reer ganto, holl rannou an ti, adal ar forn betek ar priveziou : liesarc'houereadegez a vez graet eus ar gredenn-se. Pouezus e voe ives evit stummidgez o spered bezañ miret ar feiz-se betek hon amzer : dezi, diarvar, ez int dileourion eus o c'hempennidigez, — rak lezei an tiez lous pe chom digempenn war e gorf hag e zilhad a vije kement ha kounnarañ an arc'houereed ; ha d'an da-

mant o deus ar vicherourion d'o labour, — rak labourat a zo azeulin doue al labour-se, ha ret eo e azeulin azoare ; micher an harnezour dreist-holl a oa ur wir velegiez, betek ma teujod da c'holviañ an armou e labouradegoù bras. Kement ha komz eus doueed ar micherioù, dav eo lavarout ez eus hep mar un darn vat anezo a vœ degaset gant Sinaiz ha Koreiz, nemet e teujont da vezan ken anavezet ha re ar vro. Berrzispleget ec an doueoniez *chinto* en daou levr kosañ a gement a anavezzer er yez japanek : « *Kojiki* » pe « Dielloù an Traou koz » (712), ha « *Nihongi* » pe « Dielloù Bro-Japan » (720). Mojennou iskis ha braouac'hus, disheñvel-krenn peurliesañ diouz ar mojennou ariek (3), a gaver en « doueoniez-se ». Dre vras e lavar e vœ da gentañ-holl un doue hag un doueza a c'hanas pep tra, doueed, tud, loened, astroù h. a. Doueez an Heol, *Amaterasou-oho-mi-kami* (« an Doueez Veur a sklerijenn an neñv »), bet ganet diwar lagad kleiz an Doué kent, a zo lakaet da vammigoz ar Vikadoed, hag an doueez pennañ eo, a-gevret gant he niz *Oho-kouni-nouchi-no-kami*, Roue ar Re Varv. Holl Japaniz avat a zo sellet outo evel diskennidi doueed all, kerent ha mignoned Amaterasou, hag un abeg eo martzez d'o lorzh broadel. Azeulet e vez an Doueez Veur en un neved bras en Ise, ma vez ret da bep Japanad mont di ur wech en e vuhez, hag evel ma veze graet e Breiz n'eus ket ken pell-se, tud 'zo a zo o micher ober ar birc'hirinded-se evit arc'hant e-lec'h an dud lezirek pe dalc'het gant o labour. Doueet eo bet ives tudennou 'zo eus an istorvez ; da skouer Hachiman, doue ar Brezel, n'eō nemet

(3) Nemet ez eus koulskoude mojennou 'zo a denn d'hor re, evel danevell Ourachima Taro, heñvel-souezus ouz-hini Oisín.

spered an impalaer O-Jin. En diwez ez eus kement a zoueed m'eo ret o azeuliñ holl a-strollad ur wech an amzer.

Setu enta, dre vrás, petra eo ar *chinto* ha peseurt levezon en deus bet war Japaniz : aberziñ an hienn evit an tiegez, an tiegez evit ar gevredigez, ar gevredigez a-bez evit ar vro ; kreskiñ ar gadarnded, al lealded, ar garantez-vro, eeunded ar gizioù ; hogen war un dro mougañ ar bersonelez ha lakaat ur yev pounner war choug pep hini. En ur ger, garvoc'h e oa stad Japaniz eget stad Lakedaemoniz an Henamzer, hag evelto e tegemerent kement-se a youl-vat evit brasañ mad ar vro hag ar relijion.

Evel-se edo kont pa baras war Vro-Japan mousc'hoarz ar Vouddaadegez. Degaset e voe di e-tro an IX<sup>me</sup> kantved gant misionerion sinaat ha dreist-holl koreat. Ur relijion bliju-kenañ eo ar Voudaadegez ; ret eo avat diforc'h ar gelennadurez uhel, anez un diskleriadur hollzoueadel eus ar bed, ma vezet sebez et alies o verzout penaos e kej meur a wech gant klozadurioù hór gouziegez a-vremañ (4) ; n'eo ket evel just evit n'eüs forz piv ; hag ar relijion voutin, d'ez iur yoc'h doueed disheñvel hervez ar broioù, hag a zo an treuzannezerez-eneou diazez he c'helennadurez. Gwevn-tre eo ar relijion-se, ha gallout a ra en em ober brav gant ne vern pe gredenn all, gant ma ne vo ket houmañ re resis ha re ziblegus. Ne voe ket diaes d'ar visionerion vouddaat astenn o feiz e-touez Japaniz, rak ne c'houlennent diganto netra a vije a-enep o hengredennou ; er c'hontrol, tud ampart ma oant, e

(4) Sellout ouz levr R. Jestin, « Ar Boudda hag ar Vouddaadegez », Gw. niv. 95-6.

lavarent e oa ret kehelañ ar re varv, a yae da Voudaade (da Gamied, a lavare Japaniz). Diaes a-walc'h e seblant koulkoude kenderc'hel gant azeuliñ eneoù a zo aet dija e-barz korfou all, evel m'her c'helenn ar vouddaadegez ; hogen ar veleion voudaat, paotred fin anezo, a ziskoulmas ar gudenn o lavarout ne groge an treuzvuheziou nemet kant vloaz goude ar marv : evel-se e oa lakaet un termen dereat d'ar c'hehelerez. Un diforc'h hepken : e-lec'h pediñ ar re varv e tleed hiviziken pediñ an doueed evito, met ar re varv d'o zro a dedenne gwarez an doueed war ar re vev, en doadaadegez ober ur herz sebezu e Bro-Japan hag en em veskañ gant ar *chinto*, o tousaat en un doare eürustre garvder hemañ. Ur relijion guñy ha madelezus eo ar vouddaadegez ; stouiñ a ra gant tenerded war an holl voudou evel war breudeur an den, ha difenn a ra ouz he dalc'hidi ober dezo an disterañ droug, rak aon da zoaniañ un ene treuzannezet : desket he deus evel-se da Japaniz o sevended, o habaskter, o madelez e keñver an holl dud hag al loened ; ha lakaet he deus un tamm sklerijenn hag un tamm eürusted en o buhez kalet dre lakaat an arzoù da ziwanañ. Rak ar vouddaadegez poblel ne vez ket meneg ganti eus an Nirvana, un dra uhel ha kevrinus, digomprenu-krenn d'ar bobl ; ur baradoz hag un ifern he deus, gant aelez ha diaoulou, gant goprou dedennus ha kastizoù euzus a vezed boas o livañ war mogerioù an azeuldioù ; hag evel-se eo bet dihunet spered Japaniz ha troet ouz ar gened. Ouze ar skiant iveau, rak ar veleion vouddaat a oa anezo tud ouiziek, ha kement azeuldi a savjont a voe war un dro ur skol evit ar yaouankiz. Degemeret e voent da gelennerion

zoken gant an tiegeziou a chome feal d'ar *chinto* koz. Setu d'am meno penaos e c'heller diskleriañ un darn vras eus speredegez Japaniz : kaletaet int bet gant relijon rust ar *chinto*, ha boazet ganti ouz ar sentidigez hag an dizaoñ, an tu gourel evit komz evel M. Glandour, tra ma lakae ar vouddaadegez da zi-wanañ enno ar vlividigez, an denerded hag ar garantez ouz an arzoù, — an tu gwregel. Adkavout a raimp an daou du-se o teurel ur sell ouz temz-spered Japaniz bremañ. Ezomm ebet da bouezañ kalz war o c'hadarnded : a-walc'h eo ur sell ouz an darvoudou evit kompreñez eo paotred al « listri-spluj-godell » gwir vibion soudarded Tsouchima, a bigne gant ar gwernioù evit kenderc'hel da dennañ war an enebourion, tra m'edo o lestr oc'h ober peñse. N'eo ar gadarnded-se avat nemet ur stumm a gemer o ferzmat pennañ, an emroüsted d'an never e-keñver ar Vro hag an impalaer-Doue, chomet bev peogwir eo chomet bev ar relijon goz, azeulerez ar Re Varv — (lavaret eo bet meur a wech e kase ganto ar soudarded japanat boestoù, enno ludu o c'hamaraded lazet en emgann). Hag an emroüsted-se a c'hell ober berz iveau er vuhez sivil ; ne weler mui samouraied oc'h en em lazañ dre « *harâ-kiri* » evit bezañ c'hwitet war ur gefridi, pe zoken en abeg d'ur sell du digant an impalaer, na plac'hed o troc'hañ o gouzoug « evit ma paouezo Mab an Neñv a leñvañ », hogen un dra sakr eo atav urz al lezenn, pa n'eus difore'h ebet, evel m'em eus lavaret, etre ar relijon, ar vuhezegez hag ar politikerez. Gwechall e oa kaeroc'h c'hoaz : war-dro dibenn ar c'hantved diwezañ, pa c'hourc'hennas ar Mikado ma vije desket yezoù ha skiantou ar C'hornog er skolioù japanat, e voe gwelet studi-

erion o labourat a-laz-korf evit sentiñ ha deskinn traou ken diaes evit o empennou referel. Ha pa lavar-an a-laz-korf n'eo ket un doare-komz, rak meur a hini, war a lavarer, a varvas diwar re-labour. N'ouzon ket hag e c'hoarvezfe kemend-all ma vije gourc'hennet deskinn japaneg ha sinaeg en holl skolajou Europa.

Ahendall, daoust m'eo bet lamet pell 'zo diwar choug Japaniz yev pouunner al lezennou kent a-zivout an dispignou hag ar sevended, manet eo ganto hoaziou a espernegez hag a ecunded ; ne weler ket kalz a arrebeuri, zoken en tiez pinvidikañ. Boazioù a sevended hag a zereadegez iveau : anavezet mat eo o sevended dispar, a seblant mont a-wechoù betek al lubanerez. Buhez un tiegez a zo chomet un dra sakr a dleer kuzat ouz an estren, zoken ouz ar wellañ mignonned : rouez eo klevout ur Japanad o komz eus e gerent, rouesoc'h c'hoaz eus e vugale, ha morse eus e wreg : « *shocking* »-kenañ e vefe. N'eus ket eta da souezin ma vezont gwall feuket gant hor gizioù ha dreist-holl o welout e sellomp evel reiz e kar un den e wreg hag e vugale koulz ha zoken muioc'h eget e gerent ; komzoù ar Vibl : « Hag ar gwaz a guittay e dad hag e vamm hag a garo e wreg dreist dezo » a zo evito ur wir euzadenn. Feuket e vezont iveau gant hol lennegez, ma vez meneg bepred eus ar garantez, — a zo d'o meno dizereat-kenn.

Anavezet mat eo iveau o dreistelez en arzoù, dreist-holl en arzoù « bihanañ » : treserez, kinklerez, kizellerez traezou bihan h.a. Mailhed int evit skeudennañ an aneveded en un doare eeun-tre ha bev, ur marz ; par int e-se da dud an oadvez magdalenel, a oa evel ma ouzoc'h loenlivourion dispar. Anat eo ar perz-se

zoken gant ar vugale, evel m'hen diskouez an istorig-mañ, danevellet gant Lafcadio Hearn. Gweladennet e oa bet ur wech gant bugale war-dro sez pe eiz vloaz, a c'houlenne eur profig digantañ evit gouel Jizo — a zo un doue mignon ha gwarezour ar vugale — ; roet en doa dezo ur prof mat, hag aet e oant kuit o lavarout en ur c'hoarzin e röfent iveau un dra bennak dezañ evit e drugarekaat. Dioüz an noz, pa'z eas ermaez eus e di e savas un tamm spont ennañ o welout war gael e liorz ur mell nadoz-aer, dezi tost da ur metrad ment, hag a hañvale bezañ bev ha prest da nijal. Pa dostaas, avat, e welas ne oa nemet ur skourr pin evit korf al loen, ur pod-te evit ar penn ha peder fal-dan evit an eskell, kement-se kempennet ha sklerijennet en un doare ampart-meurbet. Hag an donezonou-se ne vezont ket mouget gant an deskdurez, er c'hontrol ; — n'eo ket atav heñvel-dra ganimp, evel ma lavare X. de Langlais en deiz all. Ouzpenn-se, un doare o deus Japaniz da sellout ouz an natur ha n'eo ket hon hini : merzet eo bet meur a wech o deus kasoni ouz ar genskeudennegez en arz, tra ma klaskomp-ni an traezou « oc'h ober pared » ; marteze eo abalamour ne welomp an natur nemet a-dreuz an den, a zo kenskeudennek e gorf ; e-lec'h Japaniz, o deus evelato div vrec'h, div c'har ha div skouarn eveldomp, a wel an natur rag-eeun hag hep hantererez.

Kasket hon eus displegañ ha diskleriañ abegoù pennañ ar speredegez japanat. Hogen kement-se n'eo ket a-walc'h evit reiñ digareziou eus ar galloud o deus gouezet reiñ d'o bro. Ret eo soñjal he deus ar vro-se bevet pell amzer eviti hec'h-unan, oc'h argas ar didruez kement levezon europat. War-dro dibenn ar

c'hantved diwezañ, avat, e voe taolet trumm e-barz strollad ar broadoù bremanek, dre nerz an darvoudou koulz ha dre youl he Mikado. Gwall-risklus e oa evit ur gevredigez chomet ken disheñvel diouz kevredigeziou ar C'hornog ; edo Bro-Japan war var koll he frankiz ha mont da drevadenn saoz pe rusiat. Penaos e quezas en em ziwall diouz an tonkadur-se ? Un arouez en deus kemeret Hearn evit diskleriañ dimp an-dra-se. Klevet hoc'h eus komz eus an doare gouren anvet *jiou-jitsou* gant Japaniz. An anv-se a dalv-kement ha « trec'hiñ en ur blegañ », rak pal ar gouren-se eo lakaat nerz ar c'heveler da dalvezout da faezañ anezañ : seul greñvoc'h eo an den, seul arvarusoc'h eo evitañ. Un ampartiz diaoulek a ziskouez Japaniz evit an arz-se, à c'hell lazañ un denaes-tre, pe da vihanañ terrin dezañ un ezel pe zaou naet ha kempenn-mat, diouz ma fell d'ar gourenner ; — e gwirionez, ur seurt emgann dizarm eo kentoc'h eget ur gouren. Ma, dres an arz-se eo o deus dibabet Japaniz evit sevel galloid o bro diwar goust ar Re Wenn er Reter : lakaat nerz o enebourion da dalvezout evit dizarbenn anezo. Gouezet o deus kemmañ framm o c'hevredigez end-eeun a-walc'h evit kerzout a-skoaz gant broiou Europa hep koll an traou mat a oa er framm-se. Pa weljod Japaniz o tilezel darn eus o boazioù iskis hag o sevel labouradegoù, o teskiñ ijinou ar peoc'h ha dreist-holl re ar brezel, o fardañ kanolioù ha listri hobregonet, e voe kredet dre ar ha sentus sevenadurez Europa. Darn a oa laouen gant-se, o welout dija un dachenn nevez digoret d'ar broiou galloudus ; darn a oa doaniet o welout ur bobl ken boemus o vont da goll. Didouellet e voent

abred : ar c'hanolioù gwerzet gant Europiz, an armadoù kelennel ganto a vresas e 1905 ar Rusianed a glaske teurel o c'hrabanoù war Gorea ha Mandjouria, a selle dija Japaniz outo evel o « c'hele'h-bevañ » ... ha neuze e teujod en Europa da gomz eus « an arvar melen ». Tud 'zo avat n'o doa ket komprenet c'hoaz, seul vuioch ma voe Bro-Japan a-du gant ar Re Unanet e-pad ar brezel diwezañ ; kredet e voe e oa deut ar bugel foran da furaat. Hag an Amerikaned, taget d'o zro gant debron an impalaerouriez, a savas c'hoant enno ober eus Bro-Japan un drevadenn guzet. Klask a rejont mougañ ar vro-se evit he doñvaat, dre nañhañ outi ar marc'badourezioù retañ ; ha sachañ a rejont d'o heul ar Saozon hag Hollandiz Indonezia, a oa en a-raok kentoc'h a-du gant Bro-Japan. Anavezet eo ganeoc'h peseurt respont a-zoare a roas Japaniz d'ar brabañserez-se.

Hag istor Bro-Japan abaoe tri-ugent vloaz a zo en e bez ur respont iveau, ur respont d'ar re a gred eo ret d'ur bohl wan, evit ober berz, ober fae war he hengounioù ha mont da varmouzer sentus ar stadoù bras ha brein. Ur skouer splann-eo eus petra a c'hell ur vro dister, entanet gant ur feiz virvidik hag an doujañs ouz an hendadou. Broioù a welomp bremañ o kompreñ iveau ar wirionez-se ; broioù all a welomp — n'eo ket dav din menegiñ anv ebet, — o chom bouzar hag aheurtet hag o tilezel muioc'h-mui andoniou o gouenn. Gwà int-i ! Evidomp-ni, salv ma ouezimp ober hor mad eus skouer Japaniz.

## KUDENNOU DISTAGA

gant F. Kervella

AR V (*hag ar sonion o tenna d'ezañ : O, OU, W, U*).

Unan eus ar c'hudennou diaesa evidomp e vo unvan, pe damunvani, an doare da zistaga ar yez. Betek-hen hon eus bet preder a-walc'h gant an doare-skriva, ha n'eo ket bet studiet nemeur an distagadur.

Dre ma tevio avat ar brezoneg da veza muioc'h-mui yez pemdeziek an dud desket, e vo ret rei reolennou spisoc'h. Bremañ marteze ma'z eur krog da rei kenteliou skol-uhel e brezoneg evit ar wech kenta, ha se er-maez eus Breiz-Izel, e c'hell beza ar mare da gregi da studia eun nebudig kudennou, ha ne c'hel-ler ket mont doun e studi ar yez hep na vije strobet ganto ar studier.

Ar bodadennou bet graet evit diazeza ar reizskri-vadur nevez peurunvan o deus diskouezet e oa kudenn ar v an hini ziaesa marteze da eeuna. Ganti eo eta e krogin er wech-mañ.

### DIAZEZ

Gouzout a reer ez eo diazezet distagadur ar brezonoeg lennek, dreist-holl war zoare-distaga Bro-Leon. Kement-se a c'hoarvez dreist-holl dre ma 'z eo ledanoec'h doare Leoniz da gomz ha dre ma chom en o

zouez kalz soniou aet da goll e lec'h all, dreist-holl ar *z* gwan (o klota ouz *dd* Kembreiz) hag an diouvogalennou evel *ao* (e geriou evel *kaol, taol*).

Alies a-walc'h avat e c'hoarvez ives e tistresfe Leoniz soniou a zo : an diouvogalenn *ae* o tont da *ea* e Leon, e geriou evel *maez, laez, graet*; an *e* o tont da *ea* e geriou evel *sec'h, dec'h, bec'h*; an *o-fri* da veza *ou* (brezoumeg Leoun). Neuze e ranker klask eun doare distaga reisoc'h e lec'h all.

E-touez al lizerennou a gemm ar muia eus an eil penn d'egile a Vreiz-Izel emañ *z* ha *v*. Ac'hano an diou reolenn a zo bet degemeret e Roazon evit sevel ar reizskrivadur peurunyan :

— *z* a vo skrivet *zh* bep gwech ma vez distaget *c'h* (skrivet betek-hen *h*) e Gwened ;  
— *v* a vo skrivet e penn diweza eur ger bep gwech ma kaver *ù* e Gwened. Pevar seurt geriou a vo kemmet gant ar reolenn-se : a) geriou enno *o* war-lerc'h *a* pe *e* : *brao, klaw, kao, breo, hekleo, bleo, reo* a ranko beza skrivet *brav, klav, kav, brev, heklev, blev, rev*. — b) geriou enno *ou* war-lerc'h *i* : *diou, liou, piou, riou* a zo da veza skrivet *div, liv, piv, riv*. — k) E geriou a zo e teu *o* (evit *ao*) da veza *av* : *divalo, ilio* a vo skrivet *divalav, ililav*. — d) erfin, ar pez a zo ar pouezusa moarvat, e vo skrivet gant *v* geriou ma 'z eo deuet an *o* da vogalenn enno goude *l, n, r, z, i* kensonenn : *salo, ano, garo, mezo, hizio* (*i* a zo da veza skrivet *salv, anv, garn, mezo, hiziv* (*i* kensonenn *o* tont da *i* vogalenn).

Ne gloeo mui ar skritur eta ouz hon doare distaga boas. A-raok diluzia kudenn ar *v* er skritur hag en distagadur e rankomp diluzia da genta hini *u* kensonenn ha *w*.

#### WER SKRITUR HAG EN DISTAGADUR.

Ar son *w*, a glot ouz *o* hag *ou* kensonenn, a gaver aroueziet e pevar doare-disheñvel :

- a) gant *w* (*gwez, gwiridik, gwaz, war*).  
b) gant *ou* (*kouenza, kouign, riou, liou*).  
k) gant *o* (*koant, c'hoant, bleo, braw*).  
d) gant *v*, dreist-holl er skritur nevez : *brav, dav, riv, liv, levr, h.a.*

Eveziadenn. — E Bro-Wened ez eus en doare-skriva heuliet betek-hen daou zoare da arouezia ar son o klota ouz hor *w* :  
a) *o* dirak *a* : *hoan, hoart, goar, goan*.  
b) *ù* pe *n'* dirak *e* hag *i* : *guin guen, ha war-lerc'h l, n, r, i* : *anù, garù, hiziù*.  
Izeloc'h e vo displeget ar perak eus an doare-se da skriva.

Er skritur ne vez graet gant al lizerenn *w* nemet :

- a) war-lerc'h *g* e penn kenta eur ger : *gwenn, gwall, gwir, gweuz, eur walenn, eur werennad win*.

Er skritur nevez e vo kavet ives goude *c'h* (pa gaver *hu* e gwenedeg) : *c'hwech, c'hwek, c'hwi, c'hwiwu*.

b) dirak ar vogalenn *ou* e diabarz eur ger : *louza-wouriez*. Kement-se hepken evit ma n'en em gavo ket daou *ou* en eur gichen (skrivet e vo *louzaouenna*).

k) e geriennou a zo evel *war, Erwan, dreist-holl* er re a zeu eus ar c'hembraeg : *awen, delwenn*.

d) er geriou keyrennek savet diwar ar geriou meñeget betek-hen : *rakwel, diwar, diwan* (ha *triwech* en doare-skriva nevez).

Ne vez ket al lizerenn skrivet *w* distaget evel *ou* pe *o* kensonenn dre-holl avat.

1. E Bro-Dreger, dre vrás, e vez distaget *w* e kement lec'h ma vez skrivet.

2. E Bro-Leon hag e Bro-Gerne e teu dalc'hmat da veza distaget *v* dirak *i*, e hag *eu* (nemet er strellad *gw*) :

*gwerc'hez* (gwerc'hez), *ar werc'hez* (ar vèrc'hez)  
*gwiniz* (gwiniz), *da winiz* (da viniz)  
*gweuz* (gweuz), *diweuz* (diveuz)

Dirak *a* e vez distaget *w* e pep lec'h (nemet er ger *war* = *var*) :

*gwan*, *re wan*.

3. E Bro-Wened e vez distaget dalc'hmat *ù* (= *u* kensonenn) dirak *e* hag *i*, *zoken war-lerc'h G*, ha skrivet gant *ù* pe *u* en doare-skriva heuliet betekhen : *guin guen*, *guern*, *guir*, *huizi* (gwin gwenn, gwern, gwir, c'houizi).

Dirak *a* e vez skrivet *o* ha distaget *w* : *goard*, *goas*, *goan*, (gward, gwaz, gwan).

*Eveziadennou*. 1. An distagadur *v* dirak *eu*, *e* hag *i* e gouelet Breiz-Izel a zispleg ar c'hemmou a zo etre doare-distaga Tregeriz hag ar skritur degemeret evit ar yez unvan. Geriou evel *avel*, *nevez*, *mevel*, *mervel*, *ewit* hervez doare-distaga Bro-Dreger. Gwenediz ivez a skrife : *äuet*, *neüé*, *meüel*, *merüel*, *ehit*. Gant an dalvoudegez nevez roet d'al lizerenn *v* ne vo ket diaesoc'h evito lenn ar geriou-se eget ne deo da Dregeriz.

2. Ret eo notenni ne gaver a *u* kensonenn e Gwened nemet dirak ar vogalennou staon : *eu*, *e*, *i*. Dirak *a* e kaver ez-reiz eun o kensonenn, ca lavarout eo eur *w* klaseil. A houez bras eo kement-se evit rei da anaout e rank an daou son beza notennet gant *w*.

a) Ouspenn e Bro-Wened e vez distaget *gw*, *gwi*, *chme*, *clwi* en eun doare kemmet. Eul lodenn vat eus Leon ha Kerne a anavez an *u* kensonenn, pe gentoc'h eun *eu* kensonenn evel m'hen notenn an ao. Rouz e trede levrenn e « Atlas Linguistique ». Techet e vezet koulskoude da astenn re an holl a gredan ar son-se. Setu ar pez en deus graet an ao. Rouz end-eun, ha war labour e kaver ar son-se merket evit Plougastell ha Rumengol. Evidoun-me n'am eus klevet e kanton Daoulaz nemet *gw* (ha neket *gen* pe *gu* kensonenn), distaget dres evel e Bro-Dreger. Hervez Abeozen e yefe kavet ar son *gw* ivez en eul lodenn vat a vro-Leon. Ne glot ket

ouspenn kartennou an ao. Rouz an eil ouz eben, ar pez a zo souezus a-wale'h :

Kartenn 256 : ger *gwesklañv*, *glesker*, *ran*, h.a. Notennet ez-reiz *gwesklañv* ha *gwisklaoñ* (Notenni a ran amañ ar soniou en eun doare aes da voula) (1).

*gwisklaoñed*, *gwisklivi*.

Kart. 255 — Atao em eus klevet *gwélé* ha neket *gaéle* (*æ* = eu kensonenn) na *güéle* ; *gwélé* ha neket *gaélét* (k. 287) ; *gwén* ha neket *gaélin* (k. 290). Hevelep tra evit *gwenan* (291), *gwenneg* (293), *gwerc'hez* (294), *gwerza* (295), *gwez* (298), *gwader* (299), *gwiniz* (300).

En enep ez eo *gwetur* notennet mat-tre (297).

b) Ar vogalennou-staon ; *e*, hag *i* dreist-holl a zo anezo lizerennou kontammus. (Kv. ar pennad « Kontammadur ar vogalennou » e Yezadur ar Brezoneg Krenn Abeozen, Sterenn niv. 7, p. 30). Ha n'eo ket evit ar vogalennou nemetken eo ez int kontammus ! Setu dres ar pez a c'hoarvez gant *w* en degouez-mañ : elec'h ou pe o kensonenn e klever neuze ar son mistraet *eu* pe *u* kensonenn. An darvoud-se eo a c'hoarvez dreist-holl e kreizteiz ar vro.

Ouspenn a c'hoarvez avat : *g* ha *k* a zeu da veza distaget dre ar staon, « *glebia* » a reont e-lec'h chou da veza kensonenn nou-korzaillhenn. *G* a zeu neuze da veza distaget evel *dj* pe *dy*, *K* evel *tj* pe *tg* (eur bugel eus Hoc'htre, — Kerne-Uhel, — a skrife gant eur brizskrividur gallek : « horn diouenne » evit « holen gwenn »).

E kanton Daoulaz e kaver ivez *g* ha *k* kensonennou-staon er geriou en *-ik* pe *-ig* : *pik*, *kig*, h.a. (2).

#### GERIOU GANT GOU- ER PENN ANEZO.

Geriou evel *gouel*, *gouenn*, *gouez* a vez skrivet enno *gou-* ha neket *gw-*. Kement-se a c'hoarvez dre ma ne zeu neblec'h an *ou*-se da veza distaget *v* pe

(1) — Alies e vez klevet ar stumm *bisklaoñ*, *bisklaoñig* dre lakaat *b* e-lec'h *gw*. An darvoud enep a c'hoarvez aliesoc'h : *gwest* e-lec'h *boest*, *gwered* e-lec'h *bered*. Ret d'in lavarout ivez n'am eus klevet biskoaz al llesster sebeuz *gwesklañv* roet evit Plougastell. Atao avat em eus klevet al llesster reiz en *-ed* pe *-i* :

(2) N'eo ket hepken e brezoneg eo e c'hoarvez an dra-se. Anavezout mat a reer ar c'hemm a zo etre distagadur ch ha *g* en alamaneg hervez m'emaïnt goude eur vogalenn greñv : *a*, *o*, *u* (= ou brezonok) pe sur vogalenn wann : *e*, *i*, *u* (= u brezonok).

*u* kensonenn. Eur vogalenn wirfon eo an *ou-se*, hag e Bro-Leon da vihana e kouez ez-reiz ar pouez-mouez warni er geriou eunsilabenek. Distaga a reer, neket *gwél*, *gwén*, *gwéz*, hogen *gouel*, *gouenn*, *gouez*. Er peurrest eus Breiz-Izel ne vez ket graet eun diforc'h ken splann.

#### AR V ER SKRITUR HAG EN DISTAGADUR.

Kavet e vez *v* er skritur :

a) e penn kenta pe e diabarz ar geriou evel kemmadur diwar *b* pe *m*.

b) e diabarz geriou a zo : *ivez*, *evez*, *mevel*, *avel*, *aval*, h. a.

k) e dibenn eur bern geriou. Hervez emgleo Roazon e tleo beza lakaet hiviziken e-lec'h ma kaved e Gwened *ù*, e-lec'h all *o* pe *ou*, e brezoneg krenn *u* (gwelout uheloc'h) : *div*, *nav*, *iliav*, *levr*.

d) e dibenn pe e diabarz geriou goude eur vogalenn-fri dindan ar stumm *-ñv* a glot alies euz *ff* krenvrezonek.

E keñver an distagadur e c'heller ober daou rummad bras eus ar geriou-se :

— ar re ma 'z eo *v* eur gensonenn *c'han*.  
— ar re ma 'z eo *v* eun hanter-vogalenn.

*v kensonenn*. — v a vez dalc'hmat kensonenn pa chom anal e teu diwar *b* pe *m*, ar pez a c'hoarvez e penn kenta ar geriou pe etre diou rann eur ger kevrennek : *ar vuoc'h*, *diviz*.

*Eoziadenn*. — Ne vez ket aroueziet *v* e kement lec'h ma vez klevet. Ne vez ket merket blotadur ar *f* e penn kenta eur ger : *ar forc'h* (ne vez ket merket kennebeut blotadur *s*, *ch*, en hevelep degouez).

Ouz lost eur ger e vez aroueziet atao ar *v* n'eo ket hanter vogalenn gant *f* : *kof* (dist : *kóv*), *korf* (dist : *korv*).

v hanter-vogalenn. — Distaget e c'hell beza evel *v*, *w*, *u* kensonenn, pe zoken o vogalenn, pe c'hoaz chôm hep beza distaget.

1. Distaget e c'hell beza e pep lec'h evel *v*. Hennez en doare-distaga Goueloiz hag astenn muioch-mui a ray dre ma vo skrivet, anat eo.

2. Distaget e c'hell beza e pep lec'h (pa vez hanter vogalenn) evel *ù* : hennez eo doare-distaga Gwenediz ha reiz eo e talc'hfent d'ezan.

3. Beza distaget evel *w* e pep lec'h nemet dirak *e*, *eu* hag *i* vogalenn. Hennez eo doare-distaga an darn vrasha-eus Kerne : *klañv*, *doñv*, *kreñv*, *tev*, *liv*, *kevioù*, *levriou* a vo distaget evel ma vijent skrivet : *klañw*, *doñw*, *kreñw*, *tew*, *liw*, *kewyoa* (i kensonenn), *lewryou*.

En enep *livet*, *div eur* a vo distaget evel ma vezont skrivet.

4. E Leon ha Treger ez eo luzietoe'h c'hoaz an traou :

— a-weehou ne vez ket klevet ar *v* : *dar*, *fav*, (legumaj), *en e sav*, *kreñv*, *klañv*, *kuñv*, h.a.

— distaget e c'hell beza goude *n* : *preñv* pe etre diou vogalenn : *tevoc'h*.

— distaget *w* (o hag ou kensonenn) er geriou skrivet bremañ gant *o* pe *ou* : *teo*, *brao*, *liou*.

5. Er-maez eus Bro-Ouelo ha Bro-Wened e vez klevet dalc'hmat o vogalenn goude *t*, *n*, *r*, *z* : *salo*, *malo*, *ano*, *c'houero*, *laro*, *mezo*, *azo*, h.a., pa vez al lizerenn-se e dibenn ar ger ; hogen klevet e vez kentoe'h : *salver*, *malvenn*, *envel*, *tiroi*, h.a.

## KLOZADUR

Studi al lizerennou *w* ha *v* en deus diskouezet d'eomp eun dra : aner e vefe rei adalek bremañ eun doare-distaga reiz evit Breiz a-bez.

Tri rummad distagerien a gaver e-keñver *w* :

1. Distagerien *ù* e pep lec'h nemet er stollad *gwa* (Gwened)
2. Distagerien *w* e pep lec'h (Treger)
3. Distagerien *v* er penn dirak *e* hag *i* (Leon-Kerne).

Pevar rummad a zo e-keñver *v* (pa vez hanter vogalenn, anat eo) :

1. Distagerien *ù* e pep lec'h (Gwened)
2. Distagerien *v* e pep lec'h (Gouelo)
3. Distagerien *w* peurvuia (Kerne)
4. Distagadur kemmesket (Leon-Treger).

Gwelout a reer eta n'eus nemet e Gwened e klotfe distagadur an diou lizerenn.

Er rannyezou all, er pez a anved K. L. T. e teuio, dre ma vo ledet muioc'h ar brezoneg dre ar c'helaoennou hag ar skol, an doareou disheñvel da zistaga da dostaat buan. Eun hentenn bennak da veza heuliet a c'heller erbedi adalek bremañ :

— Argas an distagadur a lez *v* da goueza. Dibab neuze an distagadur a zereo ar gwella. Re an hanfernoz a zibabo kentoc'h *v*, re Gerne kentoc'h *w* a dosta anezo muioc'h ouz *ù* Gwenediz.

— Berraat ar geriou a vez skrivet bremañ *lano*, *baro*, *bezo*, h.a. e doare o zostaat ouz *lanv*, *barv*, *bezv*.

Mirout dreist-holl ouz liesterjou evel *baroiou*, *ma-roiou*, stummou evel *garooc'h*, h.a.

Evel-se e teuio iveau tamm-ha-tamnr distagadur ar brezoneg, evel m'eo deuet ar reizskrivadur anezañ da unvani. Arabat kaout aon da zistaga *eeun* ha *fraez*. Komprenet e viot e pep lec'h. Seul vui e « lonkot » al lizerennou hag ar silabennou, avat, seul vui e vezotenn ho komprent.

F. KERVELLA.

## TE PE C'HWI ?

Kendalc'h

Setu amañ, goude ar respont deut eus Douarnenez ha moulet war niverenn Mae-Mezeven, respoñou all d'hon enklask diwar-benn implij *te* ha *c'hwi* en hor yez.

An enklask-se a reomp dreist-holl gant skoazell izili Kevrenn ar Yezonie Vrezonek er Framm Keltiek ha kenskriveton Ensavadur Breiz. Pep respont, avat, ne vern a-berz piv, a vo deut mat. — R. H.

### BRIGNOGAN ha BRO-BAGAN

*Te* ha *c'hwi* a vez implijet dre amañ kenkoulz hag *out* hag *oc'h*.

*C'hwi* a ziskouez an doujañs. Komzet e vez dre *c'hwi* d'ar veleion, d'ar mezeg, h.a. Ar stumm-se a reer ganti iveau pa gomzer d'ar re goz.

*Te* evelato a vez implijet alies pa staget da gomz gant un estrañjour bennak, ha pa vefe hemañ un « aotrou » pe un den diwar ar maez (nemet ur beleg e vefe), tra ma vefe graet emichañs « *nous* » e galleg en ur gomz gant an hevelep re.

Ar re goz a lavar e komze ar vugale dre *c'hwi* d'o c'herent en « o amzer ». Bez' e talc'her d'ar c'hustumse e tiegezioù a zo, war am eus klevel. Hogen *te* a zo a dra sur kalz implijetoc'h eget *c'hwi* hiziv an deiz.

P. K. (Gouere 1942).

### AR FOUILHEZ

Bep gwech ma fell da unan bennak diskouez doujañs e-keñver den pe zen, e komz dre *c'hwi*. *Te* a vez graet gantañ e troioù all.

Da skouer, ez implijer *c'hwi* pa gomzer d'ar person, d'ar mezeg, d'ar skolaer. An dud yaouank etrezo a ra gant *te*.

Diwar an amzer ma stag da varvailhat, ne implij ur c'hrouadur nemet *te*. Da *c'hwech* pe seiz vloaz, avat (da lavarout eo, pa zeu d'an oad a skiant) e krog da gomz dre *c'hwi* d'e vamm. Nemet e kendalc'h da gomz dre *te* d'e dad. Hogen, da hemañ iveau, ur mab a gomz dre *c'hwi* pa'z eo deut war an oad.

Ur vamm a lavar *te* d'he bugale. E Brenniliz, avat, ur pevar c'hiometr diouz ar Fouilhez, e lavar *c'hwi* dezo, zoken pa'z int yaouank-flamm.

R. (Gouere 1942).

### GWISKRIV

Atav ez implijer *c'hwi*. *Te* hag ar stummoù-verb o kloatañ gant *te* a zo dianav.

M. M. (Gouere 1942).

### KEMPER-GWEZENNEG ha KANTON PONTREV

a) *C'hwi* a vez lavaret dalc'hmat d'an Tad ha d'ar Vamm.

b) *C'hwi* a vez lavaret gant ar baotred ouz ur merched, zoken peurliesañ gant ar vendeur ouz o c'hoarez.

k) *Te* a vez lavaret gant ar baotred yaouank kene-trezo.

Abad L. ar FLOC'H.

## TREGER ha KERNEV

E Treger e vez implijet bras *te* ha *c'hwi*.

Te a vez implijet gant ur bugel o komz ouz e dud. Diwezatoc'h, pa vez deut da greskiñ hag e dud da gosaat, e raio gant *c'hwi* peurviañ.

Ouz e dud-koz e raio atav gant *c'hwi*. Etre mignoned koz e reer alies gant *te*. Etre mignoned neyez, ober gant *te* a ziskouez en deus fiziañs an hini a ra gant *te* ouz egile.

E Kernev (Karaez, Plouger) ma'z on bet o chom eno a-raok ar brezel, em eus merzet gant souez vras eo dianav-mik implij *te*, hag hor matez hag a oa genidik eus Plouger ne gomprene ket ar gouerion ac'han pa'z aent outi gant *te*.

A.G.

## TREGER ha KERNEV

1. *Te* ha *c'hwi* a vez implijet a-gevret e Treger.

2. E Kernev, daou stumm :

a) e bro Gallag, Karnoed, e vez implijet *te* ha *c'hwi* iveauz.

b) e Mael-Karaez *c'hwi* hepken.

Ar BARZIG

## SANTEG (LEON)

Setu amañ an implij a reer e Santeg, parrez va c'herent, eus ar geriou *c'hwi* ha *te*.

1. Ar vugale a gomz atav dre *c'hwi* ouz o zad hag o mamm, tud-koz, eontred ha moerebed, hag an holl dud oadet.

An dud deut a gomz dre *c'hwi* ouz an dud a zo kalz kosoc'h egelo, pe o deus da welout warno, evel

— 420 —

'mistri, beleion... hag iveauz ouz an estrañjourion ha tud digenvez.

Anaout am eus bet graet priedou, e-touez ar ré goz, hag a yac dre *c'hwi* an eil d'egile. Rouez-kenañ int.

2. An dud er memes oad, hag eus ar memes renk, p'en em anavezont mat, a gomz atav dre *te* etrezo.

Ar gerent a ya atav dre *te* d'o bugale, hag ar re goz d'ar re yaouank.

En ur ger : *c'hwi* eo ger an doujañs ha *te* ger ar c'hendere pe an trec'h.

Abad F. GUIVARC'H.

## BRO-BAGAN

(Kendalc'h)

War va respont d'hoc'h enklask diwar-benn *te* ha *c'hwi*, n'em boa lavaret mann eus ar stumm implijet gwechall etre ar priedou, o vezañ ma'm boa bet betek neuze respontoù disheñvel. Bremañ e vez graet gant *te*. Hogen sur-on e veze graet gant *c'hwi* gwechall, emichañs kent 1900-1910. An holl respontoi am eus kendalc'h et da zastum digant ar re goz abaoe pemzek devez a zo unvan (sur a-walc'h n'em boa ket gouennataet an dud sklaer a-walc'h a-raok).

*C'hwi* hepken a veze implijet gwechall. Setu pez a lavar an It. Pont, genidik eus Brignogan (65 bloaz pe war-dro) :

« *C'hwi* a veze implijet em bugaleaj etre ar priedou. Komz dre *te* d'ar gwaz pe d'ar wreg a oa zoken ur seurt kunujenn. Ur wech, pa oan c'hoaz bugel, va mamm a c'houennas diganin mont da gerc'hat un dra bennak e ti un amezegez. Dor he zi a on

— 421 —

digor hag he gwaz a oa e-barz. Ma ! en ur glevout an daou-se o komz dre *te* etrezo, intentet em eus e oa tabut bras en ti-se, ha me en-dro d'ar gêr diouztu. »

P.K. (Eost 1942).

ENEZ SUN

*C'hwi* :

Etre an tad hag ar vamm.  
Etre ar gerent (tad ha mamm) hag ar vugale.  
Etre breudeur ha c'hoarezed.  
Etre ur c'hrouadur hag un den kosoc'h.  
Etre tud deut war an oad.  
Etre gwazed ha merc'het.

*Te* :

Etre bugale ha paotred yaouank eus an hevelep oad.

An tad pe ar vamm da unan eus o bugale a zo bet disent, evit diskouez o displijadur.

Etre bugale eus an hevelep tiegez pe tud pa vezont broc'het.

*En ur ger berr* :

Peurliesañ ez eus gant *te* ur ster-gwasaat. Tener ha seven eo *c'hwi* war un dro.

L.D.

PONT-'N-ABAD

E kanton Pont-'n-Abad, *te* a zo gourel, *c'hwi* a zo gwregel.

Ur vaouez a lavaro *te* d'an holl wazed pe baotred, zoken d'ar re n'int ket anavezet ganti.

Ur paotr a lavaro *c'hwi* d'an holl verc'het, pried ha c'hoar hag all.

E kér Bont-'n-Abad nemetken, ha moarvat diwar levezon ar galleg, e vez klevet a-wechoù brezonege-rezed o lavarout *c'hwi* da baotred a vez. Morse, avat, ne vez lavaret *te* d'ur vaouez gant ur paotr.

YOUENN DREZEN.

SKAER

E Skaer ne vez implijet nemet *c'hwi* gant an holl.

E. KRAFF.

AN HENBONT

*C'hwi* hepken a zo implijet e kanton an Henbont a-bez.

LOEIZ HERRIEU.

PONDIVI

E kanton Pondivi e vez graet gant *c'hwi* hepken. *Te* a zo dianav-krenn. Meur a wech em eus klevet me tud a ziwar ar maez, — mitizion dreist-holl degouezet nevez zo' e kér, desket ganto un nebeut frazennoù gallek, o treuzlec'hiañ e galleg an doare-komz ma raent gantañ e brezoneg. Implijout a raent *ur* furm hepken, « *toi* » pe « *vous* », ken na veze iskis meur a wech o c'hlevout o komz galleg. Unan a lavare « *tu* » d'an holl, zoken d'an itron : « *toi, Madame, tu...* » endra ma rae dalc'hmat unan all gant « *vous* » hepken, zoken ouz bugale vihan eus he ziegez hag anevedal.

Pez a lavar an am eus kavet a-hend-all kadarnaet gant daou desteni a bouez : re an AoAo. Per ar Gov ha Per ar Rouz.

1. An Ao. 'n Abad Per ar Gov, ar yezadurour ana-vezet-mat, — Doue d'e bardono ! — a oa genidik

eus Bertelame-Baod hag en deus bevet pell amzer e Keranna, e Pleuigner hag e Pondivi, — ouzpenn ugent vloaz el lec'h diwezañ-mañ.

Setu ar pez a skrive-eñ en ur pennad-skrid anvet « *Du tutoient en breton de Vannes* » et « *Mélanges bretons et celtiques offerts à M. J. Loth* », Roazon 1927, p. 198.

« Argoad : e Goueled-Gwened a-bez hag e bro Bondivi ne vez ket graet gant *te* ; e kantonioù Logunec'h ha Sant-Yec'h-an-Brevelc er c'hontrol ez eo ken boaziet *te* ma reer gantañ zoken pa gomzer ouz tud koz ha beleion. Hogen amañ e vez implijet atav ar furm *te*, morse ar furm *ha* (da), zoken evel ragany renet : *te benn, te zorn...* »

2. Lavarioù an Ao. Per ar Gov a glot penn-da-benn gant enklask an Ao. Kelenner Per ar Rouz, eus Roazon, en e labour ken talvoudus, « *Atlas linguistique de la Basse-Bretagne* ».

Evit Noal-Pondivi, ar furmou roet gantañ a ziskouez anat ne vez ket graet er vro-mañ gant *te*. Sel-lout da skouer ouz ar c'hartennoù 51, 54, 57, 60, 70, 107, hag all. Displegadur ar verboù hag ar raganyioù en eil gour unan n'eus ket anezañ.

R. KADIG.

## “ GWREG AN TOER ”

Prezegenn graet e Roazon-Breiz  
d'ar 5 Gwengolo 1942  
gant Roparz Hemon

Dizale, spi am eus, e c'hellimp lenn *Gwreg an Toer*, pez-c'hoari nevez T. Malemanche.

Displeget e voe d'ar 25 a viz Gouere gant strollad *Gwalarn* e Roazon-Breiz. Evel-se n'eo ket dianav.

Un oberenn nevez gant hon dramaour bras a zo un darvoud a bouez. *Gwreg an Toer*, hag hi berr, a dalv ar boan bezañ studiet aketus.

E-giz *Marvailh an Ene naoniek*, e tremen e-kichen Brest, er vro anavezet mat, ha karet, a gredan, gant ar skrivagner. E-giz *Marvailh an Ene naoniek* (eil stumm), n'eus en darvoudou netra dreistnatur, netra dreistordinal. Ur vaouez yaouank c'hoaz, dimezet gant ur micherour, — un toer, — deut war an oad, he deus kemeret ur mignon, un eilmestr eus ar verdeadurez-vrezel. Choantaat a ra marv he gwaz, hep hen anzav outi hec'h-unan moarvat. Dres, un deiz m'eo deut he mignon d'he gwelout, e oar emañ he gwaz e riskl da vervel, hag eñ o pignat war un doenn gant ur gorden re vresk. Ha torret e vo e c'houzoug d'ar paotr koz ? Ha digabestr e vo ar wreg ? Nann avat. Distreiñ a ra an toer d'ar gér, yac'h evel a-raok, hag ar mignon a ya kuit, marzeze da viken.

Nebout a gomzoù. Ha buhez daou zen koulskoude diskuliet en he hed. An den koz, gwidreüs ha goapaus, kriz, mat hag onest war un dro ; unan eus ar re-se a oar kemer ar bed evel m'emañ, an dud evel m'emaïnt, sturiañ e hent sioulik dre douez ar skoselloù, boazet, — dre e vicher moarvat, — da vale bemdez war var e vuhez hep koll e benn. Ar vaouez, er c'hontrol, re wan, re lent, re ziseblant iveau da stourm ouz an tonkadur. Gouzañ a ra, ha ne gred ket tec'hout, ha ne gred ket ober droug d'he fried, hag aon he deus razañ ha rak an holl, rak an amezeion, rak ar vatez zoken. Nemet ur spi, ur spi divent a sav en he c'hreiz : ur gorden vresk kaset gant ur galloud madelezus bennak d'he dieubiñ... Ha ne vo ket dieubet, rak ne zeu o dezo nemet gant ar re a oar enebiñ kalet ha buan. Gouzañ a raio, betek he deiz diwezañ marteze. Gouzañ ha derc'hel ayat, se a oar ober.

An daou zen all er pez-c'hoari, ar paotr yaouank hag ar vatez, n'int ket treset ken spis ha ken kreñv, evel ma tere. Hogen, — hag amañ ez eus merk ur gwir dramaour, — tud wirion int iveau. Ar paotr kaer, nebeut-tre a galon dezañ, hervez ster leün ar ger kalon, da lavarout eo, dezañ nebeut-tre a gadarned hag a vadelez, — nebeut-tre a youl, o klask kaout e blijadur hep-mui-ken. Ar vatezig, digor he daoulagad, oc'h ober he mad eus gwander ar vestrez.

Meuleudi voutin, lavarout eo savet-mat pez-c'hoari nevez T. Malemanche. N'hon eus ket avat re a beziou-c'hoari brezonek frammet-start, aozet pep darn anez zo gant evez. Hag ur pennober eo *Gwreg an Toer* er feur-se. Ampartiz un den a vicher, da gentañ-holl,

ha dreist-holl preder un arzour hag ur skrivagner bras. Ar gorden vresk, kreizenn hag arouez ar pez-c'hoari a-bez, a zo kempennet hec'h istor en doare ma vo tro-ha-tro pennabeg da lavaroh ha jestroù ar pevar c'hoarier, oc'h ober (hep goaperez) ur skoulm etrezo. Ha diwar an istor-se e kresk a-nebeudoù ar from hag ar c'hevrin.

Rak e *Gwreg an Toer*, evel en holl skridoù T. Malemanche, ez eus kevrin. Nann kevrin anat e-giz hini diwezañ lodenn *Gurvan*. Lavaret em eus n'eus amañ nemet tud ha darvoudoù ordinal. Kevrin o sevel padal evel tro-war-dro d'an dud ha d'an traou, ar c'hevrin a vez merzet er vuhez pemdeziek gant ar varzed, ha lakaet ganto da splannañ dirak an holl. Adarre ez eus amañ kudenn an den hag an tonkadur, diluziet, — ma c'hell bezañ diluziet, — en un doare keltiek-rik : nann oc'h en em sevel, nann o plegañ, hogen o terc'hel penn didrouz.

N'hor boa ket kavet nemeur betek-hen e c'hoariva T. Malemanche un elfenn a ro da *Wreg an Toer* ul liv dishenvel : ar fent. Ha sevel a ray Malemanche ur pez-c'hoari fentus un deiz, ne ouzon ket. Hogen an den koz amañ, an toer, a oar c'hoarzin ha farsal, — daoust m'eo teñval a-walc'h gantañ ar c'hoarz hag ar farserez.

Evidon-me, n'em eus ket diskleriet c'hoaz pez a gavan dreist er pez-c'hoari kaer-mañ : blaz gwirior ar vro, a zo va bro iveau, al Leon du, ar maezion kriz dindan an oabl izel, ha kalonoù berv an dud a seblant bezañ yen, peogwir e ouzont level.

## Gerioù angl-saoznek e brezoneg

An Ao. M. Förster a reas d'ar 6 Mezeven 1942 ur brezegenn dirak Akademi Bavariat ar Skiantoù diwar-benn « Gerioù angl-saoznek e brezoneg ».

An darn vuiañ eus hor gerioù a zo keltiek, latin pe galleg o orin. Un nebeut anezo avat a zo germanek. Betek-hen aval ne oa ket bet klasket gouzoul eus pe yez c'hermanek e teuent. Un dra hepken a oa anat : stummoù koz-koz a zo ganto.

Daoust ha ne vije ket deut ar gerioù-se diouz an angl-saozneg ? E kembraeg koulz hag e kerneveg e kaver amprestadennou graet diarvar diouz ar yez-se.

Ar goulenn eo : ha bevet o deus hon hendadoù pell a-walc'h e-tal an Angl-Saozon evit bezañ kemeret gerioù diganto ? Ar Vrezhoned kentañ a oa en em ziazezet en Arvorig kerkent ha kreiz ar 5-vet kantved (peogwir e oa endeo un eskoh breizat e Sened-Iliz Tours er bloaz 468). An Angl-Saozon kentañ a aloubas Enez-Vreiz e kentañ hanterenn an hevelep kantved. Ermaeziadeg ar Vrezhoned a badas a-hed ar 6-vet kantved.

Al luc'h skeudennerez-diwar-nij a zesk dimp edo ar Vrezhoned en Enez-Vreiz oc'h annezañ an uheldriou, tra ma veze gwell gant an Angl-Saozon difraostañ goueled an traoniennoù. Daoust ha n'o dije ket bevet an div bobl kichen-ha-kichen e-pad ur prantad hir ?

Pez a lak diaes studi ar gerioù meneg et a-us eo an dra-mañ : n'hon eus testeni ebet eus an angl-saozneg a-raok an 8-vet, testeni ebet eus ar brezoneg a-raok an 9-vet kantved. A drugarez, avat, da labouriou Luick war an henc'hermaneg, da labouriou Förster war an hengeltieg, e c'hellomp kaout un alberz eus stumm ar soniadoù er 5-vet kantved koulz en angl-saozneg hag e brezoneg.

Da skouer, hor ger *sankañ* n'hell ket dont eus an angl-saozneg *sencan* (8-vet kantved). En enep, e c'hell mat-tre diskenn diouz \**sankjan*, furm an hevelep ger en angl-saozneg ar 5-vet kantved.

En hent-se en deus dizoloet M. Förster ouzpenn 60 amprestadenn diouz an angl-saozneg e brezoneg.

Setu aze un diverrañ eus ar brezegenn. Ret dimp gortoz embannadur ar brezegenn war he hed da c'houzout hiroc'h ha da varn talvoudegez ar gavadenn.

## KI-RED AN NEÑV

Troet diwar Francis Thompson  
gant Roparz Hemon

*Un nebeut bloavezioù 'zo, e voe gouennet diganin,  
dre hantererez T. Gwynn Jones, lakaat e brezoneg  
barzoneg hollrudec Francis Thompson. Embannet e  
llee bezañ da geñver jubile Mr. Meynell, an den en  
deus graet ar muiañ da virout eñvor unan eus bra-  
sañ barzed katolik hon amzer. Al levr, a dlee ender-  
c'hel « Ki-Red an Neñv » e meur a yez, n'em eus  
gwelet biskoaz. Krediñ a ran e vo deut-mat va zroi-  
digez amañ. — R.H.*

Tec'hout a ris, a-hed an noziou hag an deizioù ;  
Tec'hout a ris, 'hed bolziou ar bloavezloù ;  
Tec'hout a ris, 'hed hentoù treuzigellus  
Va spered ; hag e-kreiz an daeroù,  
Kuzat a ris, evel war nij ar c'hoarz.  
Ha me d'an nec'h war hentoù lufr ar spi ;  
Ha me d'an traoñ dre deñvalijenn ramzel  
Islonkou spoud, o tec'hout rak an Hini  
A gleven trouz e Dreid galloudek war va lerc'h.

Hag i, padal, hep tiz,  
Distrafuilh ouz va heul,

— 430 —

Difonn ha mibin, hegus ha meurdezus,  
O skeiñ, — ha sed ur Vouez  
Hegusoc'h 'get an Treid :  
« Pep tra 'zo trubard dit, à drubard din. »

'N em zifenn 'ris, berrboellik,  
'Tal meur a brenestr ruz e ouelioù,  
Stumm-kalon, kaeliet-stank a aluzenou  
(Ha me oc'h anavezout E garantez  
O heuliañ, spontet-mik e vezen  
Da gaout Anezañ, ha netra ouzpenn) ;  
Hogen pep prenestri bihan pa zigore,  
A serre trumm gant gwent E zonedigez.  
Eskuit ar Spont, eskuitoc'h ar Garantez.  
Tec'hout a ris a-dreuz da lez ar bed,  
Da hejañ dorioù aour ar stered sioul,  
O skeiñ, da glask ur gwasket, ouz o sparliou  
Skiltrus ; o fregañ gant trouz sklintin  
Ha glabous arc'hant perzier gwenn al loar.  
Da skleur-an-deiz e laris : prim ; d'ar pardaez : buan,  
Deus-te da verniañ bleuniou neñvel yaouank  
Warnon, d'am c'huzat rak ya C'harour euzus !  
Lak-te da skerb vorennes war va zro,  
N'am gwelo ket ! Rak E vevelion holl 'm eus hoalet  
Da gavout en o lealded va zreisoni,  
E fealded Dezañ o diwirionded din,  
O eeunder ganas, hag o zouell didro.  
O herr digant an holl draou herrus a c'houennis ;  
Ha pegañ 'ris e blev c'hwibanan an avelioù.  
Hogen, hag int o flourañ, lenkr ha rebus,  
Ar savanennou hir en neñvoù glas ;  
Pe gaset gant ar Gurun,

— 431 —

O trouzal gant E garr a-dreüz d'an oabl,  
'N ur strinkañ luc'hed 'tro d'o zreid dismegus : —  
Eskuit ar Spont, eskuitoc'h ar Garantez !

Atav, padal, hep tiz,  
Distrafuilh ouz va heul,  
Difonn ha mibin, hegus ha meurdezus,  
Edo o tont an Treid,  
Ha kreñvoc'h c'hoaz, ur Vouez : —  
« Nep gwasked dit, na roez gwasked din. »

Ne glaskis mui an dra a rae din kantren  
E dremmou paotr pe blac'h ;  
Met c'hoaz, daoulagad ar vugale vihan  
A respont hag a respont, moarvat ;  
Int a zo din, ac'hoel, 'zo din hep mar !  
Ha dres pa lintre o daoulagad yaouank,  
Koant gant eilgeriou o stivellañ,  
O aelez-vat o sache dre o blev.

« Neuze, deut-hu, bugale all ar Bed, — ingalit  
Ganin (emezon) ho keneilded tener,  
Din d'ho saludiñ gweuz-ouz-gweuz,  
D'ho fardañ gant allazigou,  
'N ur c'hoari  
Gant plezoù hedro an Itron, hor Mamm,  
O festal ganti  
E-barz he' falez e vogerioù gwent,  
Dindan he stel liv-glas ; — oc'h evañ,  
Hervez ho kustum dinamm,  
Eus don ur c'halir  
Skedus gant daeroù tarz-an-deiz ». —

Hag evel-se 'voe graet :  
Kenvreur e voen en o c'henvreuriez c'hwek ; —  
Dibrennañ 'ris dorajoù kuz ar Bed.  
Anaout a ris an holl arouezioù prim  
War dremm an oabl froudennus ;  
Anaout a ris penaos e sav ar c'hoabr  
Spoumek gant rufl ar mor dirollet ;  
An traou a ziwan hag a varv  
A savis hag a weñvis ganto ; stummañ  
A rejont temz va spered, leñvus pe doueel, —  
Ha me seder pe hiraezus  
Ganto ; enkrezet gant ar pardaez,  
E gantolioù lufr pà enaou  
War santeleziou marv an deiz ;  
Pe c'hoarzus e daoulagad drant ar beure ;  
O tridal hag o niñval e pep amzer,  
An neñv ha me o leñvañ, c'hwerv  
E zaeroù c'hwek e-tal va daeroù marvel.  
Ouiz lammou ruz e galon d'ar serr-noz,  
Lammat a reas va c'halon-me,  
Va gwrez o veskañ gant e wrez. [enkrez denel.  
Hogen an traou-se c'hoaz ne frealzent tamm va  
Kaer oa d'am daeroù glebiañ divoc'h staenet  
An Neñvou, siouaz ! n'ouzomp ket  
Petric 'lavaromp, int ha me, Komz a ran ;  
O zrouz n'eo nemet fiñv, o lavar a zo mut.  
Natur, va lezvamm gaez, ne dorro ket va sec'hor ;  
Dezi, ma kar va c'haout,  
Lezel he skerb a oabl da gouezañ,  
Ha diskouez din he divronn a denerded.  
Morse n'en deus he laez  
Divalbet va muzelloù krin.

Ha tostoc'h-tostañ 'teu an hemolc'h,  
Distrafuilh ouz va heul,  
Difonn ha mibin, hegus ha meurdezus,  
Ha dreist d'an Treid-se trouzus,  
Mibinoc'h 'teu ur Vouez :  
« Nep dudi dit, na roez dudi din ».

En noaz e c'chedan fustad Da garantez,  
Va harnez tamm dre damm ac'h eus diframmet,  
Ha va diskaret war va glin,  
Dizifenn-mik.  
Kousket a raen, a gredan, ha dihunet  
O sellout goustad, setu me dibourc'het.  
E berrboellegez valc'h va c'hreñvder yaouank,  
Hejet em eus an euriou kolonennek,  
Ha sachet war va c'hein va buhez ; saotret-holl,  
Emaon em sav e-kreiz an uloc'h berniet  
Gant ar bloaveziou, — ha dindan ar bern,  
Setu ur c'horf mac'hagnet : va yaouankiz varv.  
Frailhet eo bet va deizioù, aet e moged,  
C'hwezet ha tarzet 'vel un heolstrink war ur stêr.  
Ha setu diank d'an huñvreer  
An huñvre, hag al lourenn d'ar lourenner.

Zoken ar faltazioù stag, o bleunioù punet  
En-dro d'an douar, ouz va arzorn lusket  
E-giz ur bravig, plegañ 'reont ; o c'herdin.  
Re vresk d'an douar-se, a reuzioù karget.  
Ha bez' e vefe Da garantez neuze  
Ur blantenn, peurzivarvel, ha padal  
Hep gotzañ bleuñv ebet nemet he bleuñv ?  
Ha ret eo dit,

Skeudennour diharz,  
Krazañ ar goadenn kent skeudenniñ ?  
Va freskter a zo aet da hesk, 'vel glav er poultr ;  
Ha bremañ eo va c'halon 'vel ur stivell freuzet,  
Daerou o chagañ en he strad,  
Takenn-ha-takenn stlabezet  
Eus ar menoziou leiz a zaskren e barradur  
Klemmus va spred.  
'Vel-se emañ : petra a vo ?  
C'hwerp-put ar c'hreiz, pe vlez 'vo gant ar bluskenn ?  
Damveizañ 'ran dre latar an Amzeriou.  
A wech da wech, avat, e tarz un drompilh  
Ahont, eus kastell kuz ar Beurbadelez :  
Digeriñ 'ra al latar, hag adarre [tadik.  
En-dro d'an tourioù damspermantet, serriñ 'ra gous-

Hogen ar Galver, Hennez am boa gwelet,  
E sae limestra skedus war E dro,  
Ha siprezkurunennet ;  
E anv a ouzon ; yez e drompilh 'anavezan.  
Hor buhez pe hor c'halon pa gemerez  
Da drevad dit, ha bez' e rank Da bark  
Drusaat gant teil ar maro brein ?

Hag er redadenn hir atav,  
Tostoc'h ha tostoc'h 'teu an trouz ;  
En-dro din 'vel ur mor e tarz ar Vouez :  
« Ken freuzet-se da dir,  
Brnzunet darn dre zarn ?  
Sed, tec'hout 'ra pep tra, pa dec'hez Diouzin !  
A zen truezus, iskis, dister,  
Tuet ec'h eus karantez ! Me hepken

'Oar ober kalz gant mann.  
 Karantez-den a c'houlenn dellid-den,  
 Penaos ec'h eus dellezet, te,  
 Eus libistr gludek an denelez al loudourañ moudenn ?  
 Siouaz, ne ouzout ket  
 Na dizellezek out a vezañ karet !  
 Ha piv a gavi-te d'az karout, te, disleber,  
 Nemeden, Me, nemeden, Me hepken ?  
 Kement a lamis diouzit p'em eus lamet,  
 Da ober gaou dit ne oa ket.  
 Hogen evit m'hen klaskjen 'tre Va divrec'h.  
 Kement a gredez a zo kollet,  
 Bugel ma'z out, a viran dit er gêr.  
 Sav, krog em Dorn, ha deus ».

Ehanañ 'ra an Treid em c'hichen :  
 Neuze, ne oa va zeñvalijenn  
 'Met skeud E zorn, astennet din ez flour ?  
 « A, diot, dall ha gwan m'out bet,  
 Me eo an Hini ac'h eus klasket,  
 Argas a rez karantez p'Am argasez. »

## KANENN ALTABISKAR

Kanenn euskarek  
 lakaet e brezoneg  
 gant Maopreden

*Notenn.* — Ar varzoneg euskarek-mañ a zo bet awenet gant darvoud hollvrudet marv Rolant e traonienn Ibañeta. Tabutoù diziwez a zo savet diwar he fenn etre ar ouzieion, darn o lavarout e tenne da amzer an darvoudoù, darn o tougen e oa kalz yaouankoc'h. Gwirheñvel eo emañ ar gwir gant ar re ziwezañ-mañ, ha n'eo ket kalz kosoc'h ar ganenn eget kreiz an XVII-vet kantved.

Altabiskar eo anv ar menez hag a zo a-us da ode Ibañeta.

Skiltret he deus ur youc'hadeg  
 Eus kreiz meneziou an Euskared,  
 Hag an etxecho-jaun (1), sonn dirak e zor,  
 En deus digoret e ziskouarn ha lavaret : « Piv zo aze ? petra 'venner ouzin ? »  
 Hag ar c'hi, a oa kousket e-harz treid e vestr,  
 A zo aet en e sav hag en deus leuniet trowardroioù Altabiskar gant e harzadennoù.

(1) Mestr an ti.

En ode Ibañeta, un trouz a dredern.  
 Tostaat a ra, o stekiñ da zehou, da gleiz ar  
 rec'hell ;  
 Bouderez teñval ur armead o tont.  
 Hor re-ni o deus respontet dezañ eus kern ar me-  
 neziou ;  
 Laosket o deus arouez-c'halv o c'horn-boud,  
 Hag an etxeko-jaun a lemm e viroù.  
 Dont a reont ! Dont a reont ! Pebez garz a c'hoa-  
 fiou !  
 Nag a vannielou a bep liv a stlak en o zouez !  
 Skedusat luc'hed a strink eus o armou !  
 Pet int-i ? Paotred, kontit mat anezo.  
 Unan, daou, tri, pevar, pemp, c'hwech, seiz, eiz,  
 nav, dek, unnek, daouzek,  
 Trizek, pevarzek, pemzek, c'hwezek, seitek, tri-  
 wec'h, naontek, ugant,  
 Ugent, hag, a-vordih, re all c'hoaz.  
 Koll amzer a rafed o klask o niveriñ.  
 Unanomp hor brec'hiou gwenv ha nerzus, difram-  
 momp ar rec'hell-mañ,  
 O stlapomp eus kern ar menez d'an traon  
 Betek war o fennou ;  
 Flastromp anezo, skoomp ar marv ganto.  
 Petra 'felle dezo, en hor meneziou, an Hanterno-  
 ziz-se ?  
 Perak int deut da lakaat strafuilh en hor peoc'h ?  
 Pa grouas an Aotrou ar meneziou-se, bez' e vennas  
 n'o zreuzfe ket an dud.  
 Met ar rec'hell, o troenniñ, a gouez, a flastr ar  
 soudarded.

Ar gwad a red, ar c'high, draillhet, a zarlamm.  
 O ! nag a eskern torret ! Pebez mor a wad !  
 Tec'hit ! Tec'hit ! C'hwi hag a chom ganeoc'h  
 nerz a-walc'h hag ur marc'h.  
 Tec'h, roue Karloman, gant da bluennoù du ha  
 da gabell ruz ;  
 Da niz muiañ-karet, Rolant nerzus, emañ-eñ asten-  
 net marv ahont.  
 E gadarnded q'he deus talvezet mann dezañ.  
 Ha bremañ, Euskariz, lezomp ar rec'hell-se,  
 Diskennomp buan da gas hor biroù d'ar re a dec'h.  
 Tec'hel a reont, tec'hel a reont ! Pelec'h emañ  
 'ta garz ar goafioù ?  
 Pelec'h emañ ar bannielou a bep liv o stlakañ en  
 o zouez ?  
 Ne strink mui al luc'hed eus o armou saotret a  
 wad.  
 Pet int-i ? Paotred, kontit mat anezo.  
 Ugent, naontek, triwec'h, seitek, c'hwezek, pemzek,  
 pevarzek, trizek,  
 Daouzek, unnek, dek, nav, eiz, seiz, c'hwech,  
 pemp, pevar, tri, daou, unan.  
 Unan ! n'en em ziskouez ket unan ouzpenn.  
 Echu eo. Etxeko-jaun, d'ar gêr e c'hellit distreiñ  
 gant ho ki,  
 Pokat d'ho kwreg ha d'ho pugale.  
 Purañ ho pirou, o dastum gant ho korn-boud, ha  
 goude o astenn da gousket warno.  
 En noz, an erered a zeuio da zebriñ ar c'high flas-  
 tret-se, Hag an holl eskern-se a wennay er beurba-  
 delez.

Dindan ar Wask

E TI "SKRIDOU BREIZH"

## GERIADUR-GODELL BREZHONEK-GALLEK

ganf  
ROPARZ HEMON

Nevez embannet

E TI "SKRIDOU BREIZH"  
BREST

AN AOTROU BIMBOCHET E BREIZH  
romant gant Roparz Hemon

ENE AL LINENNOU  
gant Langleiz

*Levrioù Ropars Hemon*

E ti " Skridoù Breizh " — Brest

## GRAMMAIRE BRETONNE

■

## DICTIONNAIRE DE POCHE

FRANÇAIS BRETON

■

LES MOTS

DU BRETON USUEL

CLASSÉS D'APRÈS LE SENS

*Evit ar Skolioù*

## ME A LENNO

gant Yann Sohier

skouennou gant Creston

(*Moulerezh-Kreiz Roazon*)

## ME A ZESK BREZONEG

gant Fr. Ugen ha V. Sette

(*e gwerz e Skol Santez-Barba, Rosgo*)

---

Moulerez 17, ru d'Algesiras, Brest  
Ar Merour : Y. DREZEN .

---

# GWALARN

Kelaouenn viziek

Rener : Roparz Hemon

Priz : 50 lur ar bloaz

Kas an arc'hant da :

L. NEMO, 110, Bd. de Metz, Rennes  
(C. C. 12I-10 Rennes)

Priz an niverenn : 10 lur

Aotre-embann niv. 408

Autorisation de paraître n° 408